

SIAUW NGO GIE

SAMBOENGAN DARI:

„SIAUW NGO GIE”

BAGIAN PERTAMA



BAGIAN KA-DOEA

(TAMAT)

=====
DJILID KA 3
=====

Karangannja :

WEN KUANG LOU

&

FENG MI TAO-JEN




1930

PENERBIT:

N. V. HANDEL MIJ & DRUKKERIJ

— KENG PO — BATAVIA —




SIAUW NGO - GIE

Bagian ka-doea.

at a w a .

Pembrontakannja Siang Yang Ong.



SIAUW NGO GIE.

Bagian ka-doea.

atawa

Pembrontakannja Siang Yang Ong.

„Boekannja akoe terlaloe marendah,“ kata Pang Jan. „Sabetoelnja nona poenja ilmoe kapandean djangan kata di antara bangsa prampoewan, sekali poen bangsa lelaki di seantero doenia, soeker ditjari kadoewanja. Akoe tida brani membilang soeda perna mendapat pengadjarannja goeroe jang ternama, tapi kapandean di atas koeda, di moeka boemi, berlompat tinggi dan menggoenaken delapanbelas roepa sendjata, sedikitnja akoe paham djoega, dan bebrapa banjak panglima dalem Ong-hoe, tida ada satoe jang bisa tandingin akoe; tapi sekarang koetika berhadapan sama nona, belon berdjalan bebrapa djoeroesan, lantas sadja kaoe soeda bisa bikin akoe djadi tida bersendjata, kamoedian dengan tida taoe apa sebabnja akoe soeda djato meloso dalem keadahan pangsang. . . .“

Lou So Tjin koetika mendengar sampe di sini, lantas sadja berkikikan tertawa geli. „Djika pada waktoe bertanding pikiran djadi gelap, tentoe sadja moesti djato,“ kata ia dengan manis.

„Masi ada soeatoe hal jang akoe ingin menanjaken pada nona,“ kata lagi Pang Jan. „Itoe sendjata resia jang nona goenaken boewat meroeboeken akoe poenja kawan ada sendjata resia apa? Sebab akoe tida meliat satoe apa, tapi sabaliknja kawankoe itoe lantas sadja djato pang-

san. Akoe soeda meliat bebrapa banjak orang jang menggoenaken sendjata resia, tapi selamanya akoe belon perna meliat jang saroeapa itoe dan begitoe poenja bagoes bakerdjanja."

Lantaran Pang Jan teroes-meneroes marendah dan oempak-oempak itoe prampoewan genit, soeda membikin itoe prampoewan poenja hati djadi loemer laksana lilin kena panas. Iapoenja pikiran jang hendak memboenoh pada Pang Jan, sedikit poen tida ada jang katinggalan. Lagian Pang Jan poenja paras moeka boekannya djelek, tjoema kaloe dibandingkan sama Louw Tien jang tjakap, soeda tentoe sadja berbeda banjak. Lou So Tjin mendenger Pang Jan menanjaken prihal sendjata resia, ia lantas berbangkit dengan paras moeka manis dan sabar.

"Apabila siangkong hendak meranjaken akoe poenja sendjata resia itoe." kata ia "boekannya akoe boeka moeloet besar, dalem sa'antero doenia tjoema akoe sendiri sadja jang poenja, sebab akoe poenja goeroe tjoema toeroenken itoe matjem kapandean pada akoe sendiri sadja."

"Siapatah kae poenja goeroe itoe?"

"Ako poenja goeroe poen ada saorang prampoewan," manerangkan Lou So Tjin, "jaitoe jang mendjadi djoega akoe poenja 'ma angkat. Akoe poenja ajah-angkat bernama Hwan Thian Poo, jang tergelar Siam-tian-tjioe. Ini hal kaloe boekannya kae tentoe akoe tida mae kasi taoe. Sedang akoe poenja 'ma-angkat itoe, ada bini moedanja akoe poenja ajah-angkat. Boekan sadja ia soeda mengadjar akoe itoe ilmoe sendjata resia, malah akoe poenja ilmoe silat djoega ia jang adjar. Ia sendiri pande sekali menggoenaken sendjata resia jang dinamaken lioe-seng-thoei. Ia masi ada mempoenjai satoe soedara prampoewan

jang oemoernja lebih moeda dan bernama Hie Hong. lalah jang mintaken pada akoe poenja goeroe soepaja toeroenken itoe wasiat padakoe. Tadinja akoe poenja goeroe tida maoe meloesken, tapi pada sasoedanja akoe meminta denggen sanget, baroelah ia kasiken itoe wasiat padakoe."

"Wasiat apa sih? menanja Pang Jan.

"Itoe wasiat dinamaken Ngo-sek-bie-hoen-pee, jang meroepaken satoe salampe, dan ini selampe dimasoekin berbagi-bagi matjem obat-obatan. Itoe selampe ditaro dalem satoe kantong, sedang pada itoe selampe ada digantelin lima gaetan emas, jang meroepaken lima warna dan inilah djoega sebabnja maka diseboet Ngo-sek-bie-hoen-pee. Salah-satoe gaetan itoe, menondjol ka sabelah loewarnja kantong, dan apabila kita maoe goenaken, satoe djeridji moesti digaetken pada itoe gaetan, jang kamoedian ditarik kaloewar, dalem sa'at itoe djoega, kita poenja moesoeh lantass roeboeh denggen pangsan. Tjoema sadja soeatoe hal jang kita haroes perhatiken, djika kita maoe goenaken ini wasiat, selamanja kita moesti berdiri di atas angin sebab kaloe kita sendiri berada di bawah angin, kita poen kena tjioem baoenja itoe obat jang menempel di salampe dan tida ampoen lagi moesti djato pangsan djoega."

Pang Jan beroelang-oelang memoedji, katanja itoelah ada samatjem wasiat jang djarang ada, maka ia merasa ingin sekali meliat bagaimana roepanja.

"Tapi," kata Pang Jan achirnja, "apabila obatnja soeda abis, apa nona bisa bikin lagi sendiri jang baroe?"

Lou So Tjin golengken kapala.

„Tida, akoe tida bisa“, kata ia. „Malah koetika goeroekoe trimaken ini wasiat padakoe, dengan wanti-wanti ia memesen, djangan sekali akoe goenaken dengan sembarangan. Kaloe boekannya kita poenja djiwa sendiri ampir binasa dan terantjam bahaja besar, baroelah akoe boleh goenaken. Sebab pada saban kali akoe goenaken, akoe poenja goeroe poenja oemoer djadi koerang lima tahun. Lantaran di antara tjampoerannya itoe obat-obatan ada terdapat baji jang masi belon dilahirken, dari kandoengannya sang iboe, lagian moesti baji lelaki baroe boleh. Itoe baji jang belon dilahirken, diambil iapoenja otak dan hatinja sabagi tjampoeran obat jang paling teroetama.

„Laen-laen obat biar poen mahal masi bisa dibeli dengan oewang, tapi ini otak dan hatinja baji jang belon dilahirken dari kandoengan iboenja, boekannya barang jang gampang didapetken. Sebab moesti korbanken bebrapa banjak djiwa manoesia. Sebab kaloe kita soeda dapetken satoe korban—satoe prampoewan jang lagi hamil—kamoedian peroetnja dibelek dan kaloewarken bajinja jang ia kandoeng, tapi ternjata boekannya baji lelaki, dengan begitoe, boekantah memboewang doewa djiwa manoesia dengan pertjoema sadja? Inilah djoega sebabnja goeroekoe soeda melarang akoe goenaken dengan sembarangan. Ini hari, koetika akoe djalan-djalan ka gredja akoe denger ada toekang djoewal silat jang bikin riboet, katanja itoe toekang-toekang silat ada bebrapa di antaranja jang mempoenjai ilmoe kapandean tinggi, maka akoe lantas membekal itoe salampe dan betoel sadja, kaloe boekannya itoe wasiat, nistjaja akoe moesti djadi binasa dalem tangannya kae poenja kawan“.

„Aja, aja, itoelah sasoenggoenja ada soeatoe

wasiat jang sanget berharga," kata Pang Jan. „Akoë harep sadja nona soeka kaloewarken dan kasi liat padakoë.“

Lou So Tjin pikir, sekarang ia soeda mendjadi soewami-istri sama Pang Jan, tentoe sadja tida ada halangannja kasi ia liat itoe wasiat. Laloe ia menghamperi satoe peti dan lantas ia boeka selotnja. Di laen fihak, Pang Jan dengan poera-poera bilang gerah, lantas sadja melepaskan iapoenja badjoe pandjang. Ia liat itoe randjang kamanten memake klamboe dari soetra idjo, jang itoe waktoe disangketin pada sapaasang sangketan dari emas. Di dalem pembaringan ada teratoer bantal-bantal jang memake saroeng soelam dan spreï baroe jang bresi, sedang hawanja sangat haroem sabagi djoega dalem kajangan.

Di dekat klamboe ada tergantoeng satoe pedang, jang depan blakangnja tadjam dan memake satoe saroeng dari koelit ikan tjoetjoet, ditimpalin sama rombe-rombe jang berwarna koening. Sedang di atas satoe tembok ada tergantoeng satoe golok. Pang Jan perhatikan, itoe semoewa dengan terliti, agar kamoedian djika ia maoë ambil djadi gampang. Itoe waktoe Lou So Tjin soeda ambil kaloewar itoe salampe aneh dari peti dan berkata : „Siangkong, djangan kena tjoem baoenja. . . .“

Pang Jan satelah meliat itoe barang, dengan tida sabaran lagi lantas sadja angsoerken sabelah tangannja boewat merampas. Lou So Tjin tarik kombali tangannja jang soeda saparo diangsoerken, sembari moendoer satoe doewa tindak ka blakang. Itoe waktoe djoega iapoenja halis dikeroetken dan kadoewa matanja mengawasi dengan tetap pada Pang Jan.

„Ach, apa barangkali siangkong maen gila

dan boekannya satoeloesnja hati menikah sama akoe?" kata ia dengan soewara koerang senang dan bertjoeriga.

Itoe waktoe Pang Jan baroe mendoesin jang ia soeda kaboeroe napsoe dan dengan lekas ia oendjoek paras moeka bersenjoem.

„Wah, nona terlaloe bertjoeriga," kata ia. „Kaoe sama akoe soeda djadi soewami-istri dan soewami-istri poenja perhoeboengag ada sanget rapet, bagaimana nona katakan akoe maen gila dan boekannya satoeloesnja hati?"

„Itoe tida oesa perdoeli akoe terlaloe bertjoeriga atawa tida," kata Kioe-bwee-sian-ho; „toenggoe sampe kita sasoenggoenja soeda mendjadi soewami istri tjoekeop satoe boelan, baroelah kaoe boleh liat ini salampe."

Sahabisnja berkata ia lantas hamperi itoe peti sabagi djoega maoe taro lagi itoe barang ka dalemnja. Pang Jan lantas tebelin moeka sembari tjengar-tjengir.

„Tida bisa, nona!" kata ia. „Biar bagaimana djoega akoe ingin liat sekarang djoega." Tapi sekali poen berkata begitoe, toch ia tida brani meraba badannja si nona dan oendjoek sikep seperti orang jang bertjinta. Sebab Pang Jan biar poen tida bisa dibandingken sama itoe „siauw ngo gie," toch ada saorang jang berhati baik dan djoedjoer. Kaloe boekannya begitoe, nistjaja ia aken membikin tertjemar namanja iapoenja goeroe jang begitoe terindah dan termashoer.

Di laen fihak Lou So Tjin tida mengopenin omongannja Pang Jan, lebih siang ia soeda simpen lagi itoe salampe ka dalem itoe peti, kamoe dian ia lantas koentjiken selotnja. Tatkala ia berbangkit lantas ia menoelek pada Pang Jan,

dengen sebelah tangannja sembari berkata :
„Lantaran kae kata 'gitoe, akoe sengadja tida
maoe kasi kae liat sekarang !”

Tapi Pang Jan lantas berkelit, hingga tangan-
nja itoe prampoewan genit tida bisa mengena-
ken iapoenja toeboe.

„Kaloe kae tida maoe kasi akoe liat,” kata
ia, „akoe poen tida maoe memaksa.”

Djoestroe pada itoe waktoe, kadengaran soe-
waranja satoe boedjang prampoewan berkata
dari sebelah loewar: „Sekarang soeda djam
sapoeloh, harep 'ba-mantoe soeka lantas masoek
tidoer sadja.”

„Ai, kiranja soeda malem”, kata Pang Jan.
„Soeda waktoenja moesti tidoer”.

Lou So Tjin manggoetken kapala, kamoedian
ia lantas melepaskan semoewa barang perhiasan-
nja jang ia pake. Ia ambil soetra idjo boewat
menahan iapoenja ramboet jang soeda terlepas
dari kondenna. ia melepaskan djoega iapoenja
pakean loewar dan koen. Di itoe waktoe, ia ka-
liatannja djadi begitoe cilok dan menarik hati,
terlebih lagi lantaran di bawahnja panerangan
lampoe. Kaloe sadja boekan Pang Jan, jang
berhati kefas seperti batoe, biar poen tadinja
telah berniat memboenoe pada ini prampoewan,
sampe pada itoe waktoe tentoe djadi loemer se-
perti saldjoeng jang kena sinarnja matahari.

Kioe-bwee-sian-ho oendang Pang Jan naek doe-
loe ka atas pembaringan, tapi sabaliknja ia itoe
oendang itoe prampoewan naek sadja doeloean.
Tatkala baroe sadja Lou So Tjin rebahkan badan-
nja ka dalem pembaringan, Pang Jan lantas pa-
demken semoewa lampoe jang berada di sitoe.

„E-eh ! mengapa kae pademken semoewa pa-
nerangan ?” menegor Lou So Tjin. „Akoe denger

orang bilang, katanja ini malem tida baik pademken lampoe”.

„Ada lebih baik dipademken“, djawab Pang Jan. „Akoë ada mempoenjai samatjem penjakit, apabila ada sinar panerangan lampoe tentoe akoë tida bisa tidoer“.

„Akoë denger kaloe maleman pertama djadi kamanten bergelapan katanja tida baik.

„Tida, ini hari ada hari jang paling bagoes dan tida ada barang satoe roepa pantangannja“.

Sembari berkata begitoe sembari menggoeleng tangan badjoenja dan bikin betoel iapoenja sepatoe jang ia pake, kamoedian ia menghampéri ka hadapan pembaringan. Kioë-bwee-sian-ho kiraken Pang Jan maoë naek tidoer ka atas pembaringan, tida taoenja ia mengoesoet mengambil itoe pedang, jang tadi ia soeda liat terang tergantoeng di dekat sangketan klamboe. Sabagitoe lekas ia dapet raba saroengnja itoe sendjata ia lantas angkat dari gantoengannja dan teroes tjaboet itoe pedang dari iapoenja saroeng. Lou So Tjin poen boekannja saorang goblok, koetika ia denger itoe soewara jang tida sabagimana moestinja lantas ia menanjaken :

„Kaoë lagi bikin apa?“

Itoe pertanjanan dielangken sampe bebrapa kali, tapi Pang Jan teroes boengkem tida maoë kasi penjaotan. Sabaliknja ia toesoekin itoe pedang ka djoeroesannja itoe prampoewan genit. Itoe waktow kaloe sadja Lau So Tjin berlompat toeroen ka djoeroesan depan, nistjaja iapoenja djiwa lantas tiwas, tapi ia berkelit dengan goelinken badannja ka samping, maka itoe toesoekan djadi mengenakan tempat kosong. Berbareng dengan itoe Kioë-bwee-sian-ho menendang dengan sabelah kakinja ka djoeroesan poendaknja Pang

Jan, orang siapa lantaran koerang awas, poendak-
nja terkena itoe tendangan dan toeboenja djadi
kadjengkang ka blakang.

Lou So Tjin goenaken ini koetika baik, lantas
berlompat toeroen ka bawah randjang dan teroes
memboeroe ka itoe tembok di mana ada tergan-
toeng itoe golok. Kombali Pang Jan menoesoek
sama iapoenja sendjata, tapi kombali itoe pram-
poewan beroentoeng bisa kasi liwat dengan ber-
kelit. Ini teresebab Lou So Tjin berada dalem ia-
poenja kamar sendiri, biar poen tida ada pane-
rangan lampoe, tapi ia kenal baik keadabannja
dalem itoe kamar. Maka ia soeda beroentoeng
bisa dapet raba itoe golok jang lantas dihoenoes.

„Toeloeng, toeloeng, ada pemboenoeh!“ ber-
seroeh ia sakeras-kerasnja.

Itoe boedjang-boedjang prampoean jang me-
noenggoein di loewar kamar, semoewanja telah
denger soewara riboet-riboet dan gedeboekan
di dalem kamar. Blakangan soewara seroehannja
Lou So Tjin, iaorang tida bisa denger terang apa
jang dimaksoedken. Oleh kerna itoe, iaorang dja-
di merasa heran, mengapa harian pertama kawin
sadja soeda maoe memaen dengan saling] poe-
koel.

„Soedalah, nona, djangan bikin riboet,“ kata
salah-satoe antaranja. „Hari pertama soeda begi-
toe, nanti kaloe orang loewar dapet taoe tentoe
diboewat boewah tertawahan.

„Tjilaka, toeloeng! ada pemboenoeh!“ berse-
roeh lagi Lou So Tjin. „Hajo, lekasan kasi ka-
bar pada Toaya.“

Orang tentoe aken persalahkan Pang Jan ter-
laloe kaboeroe napsoe, mengapa ia tida maoe
menoenggoe doeloe sampe itoe prampoewan ti-
doer poeles dan sampe ia bisa dapet tjoeri itoe

salampe Ngo-sek-bie-hoen-pee, baroelah ia boe-noeh pada Lou So Tjin. Tapi ini doegahan ada sanget kliroe, sebab Lou So Tjin-manatah bisa tidoer poeles!

Pang Jan koetika meliat Lou So Tjin soeda menghoenoes golok, ia taoe bahoewa ia boekannya itoe prampoewan poenja tandingan. Ia poera-poera membatjok sama pedangnja, berbareng dengan itoe ia tarik kombali sendjatanja dan balikin badannja memboeka keree dan teoes berlompat kaloewar. Itoe waktoe satoe boedjang prampoewan mendatengin dan dari sinarnja lampoe ia kenalin itoe orang jang berlompat kaloewar ada kaman-ten lelaki.

„Soeda terdjadi a”

Tapi pada sabelonnja itoe boedjang bisa melandjoetken iapoenja bitjara, lebih siang iapoenja kapala soeda terpisa sama iapoenja badan, kerna Pang Jan poenja tabasan pedang. Satoe boedjang prampoewan jang laennja tida brani mende-keti dan doewa boedak prampoewan jang djoega berada di sitoe, lantaran katakoetan dengan goegoep pada berseroeh: „Toeloeng! Pemboenoh! Toeloeng!”

Dalem sasaät itoe djoega, Lou So Tjin berlompat kaloear dari iapoenja kamar.

„Hei, lelaki binatang, bagoes sekali kae poenja perboewan, soeda bikin tertjemar akoe poenja nama!” kata ia dengan geregetan.

Pang Jan berlompat kaloewar dari itoe roemah sampe ka satoe lataran. Biar poen kaādahan di sitoe sangat gelap, tapi pada sasoedanja ia meremken doeloe dan koetjek-koetjek kadoewa matanja, dengan perlahan ia djadi biasa sama kagelapan. Mendadak dari satoe pinggirana ada berlompat menerdjang satoe orang.

„Manoesia boesok!” berseroeh orang itoe. „Dari satadian akoe soeda mendoega, bahoewa kae boekannya mengan-doeng maksoed baek; sekarang ternjata akoe poenja doega-

han tida kliroe. Kee Toako, bantoein akoe tangkep ini manoesia boesoek."

Pang Jan kenalin, orang jang bitjara ada Tio Poo, orang siapa seperti tadi soeda dibilang, telah adjak Kee Sian pergi ka loewar boewat bitjara resia. Kerna Tio Poo masi teroes gelain Kioe-bwee-sian-ho, kaloe ia belon bisa dapetken si eilok hatinja masi teroes penasaran sadja. Tatkala ia adjak Kee Sian ka tempat sepi, lantas sadja ia kasi taoe bahoewa Lou So Tjin menaro tjinta padanja dan maoe kawin padanja.

„Itoelah tida nanti bisa kadjadian, sebab sekarang iaorang soeda sembarang di hadepan medja samkay," kata Kee Sian. „Kaloe sadja kae lebih siang kasi taoe padakoe, nistjaja akoe maoe toeloeng lamarken boewat kae; tjoema sadja belon taoe apa diloloesken atawa tida. Lagian kita sama Lou Toako boleh dibilang sobat jang rapat, itoe lamaran sabetoelnja tida terlaloe enak boewat dimadjoeken."

„Mengapa boleh tida enak sih, malahan Lou Toako sendiri doeloean ada mengandoeng itoe maksoed."

„Biar bagaimana djoega, ini waktoe soeda tida bisa. Ibarat beras soeda djadi boeboer."

„Akoeh ada satoe daja, kaloe sadja soedara soeka membantoe padakoe, akoe ada satoe niatan."

„Niatan apa?"

„Kae bantoein akoe melanglang. Sebab akoe maoe meoenggoe sampe Pang Jan tidoer poeles, kamoedian akoe maoe masoek ka dalem kamar penganten dan boenoeh mati padanja. Dengan begitoe, itoe penganten prampoewan lantas mendjadi satoe djanda. Dan itoe waktoe, kaloe akoe madjoeken lamaran pada Lou Toako, boekankah akoe poenja lamaran itoe djadi gampang bisa ditrima?"

„Kaloe kae maoe djoega berboeat begitoe, baeklah, akoe maoe membantoe."

Begitoeelah itoe doewa pendjahat berdami dengen mateng dan koetika iaorang sampe ka lataran dekat kamar penganten, djoestroe pada waktoe Pang Jan memboenoeh itoe boedjang prampoean. Itoe doewa pendjahat djadi merasa heran.

Ia-orang terpentjar menghamperi itoe roemah, koenjoeng-koenjoeng kaliatan Pang Jan berlompat kaloewar, maka Tio Poo lantas sadja madjoe menerdjang sembari memaki dan mengajoen iapoenja golok jang terhoenoes. Kee Sian poen datang membantoei kawannja. Pang Jan poenja ilmoe kepandean memangnja sanget berwates, bila ia menggoenaken sendjata golok masi mendingan, sekarang ia goenaken satoe pedang, soeda tentoe sadja terlebih lagi koerang enak bagi ianja. Bagi Kee Sian dan Tio Poo ia tida koewatirken, tapi jang ia paling koewatirken adalah Lou So Tjin.

Tjoema beroentoeng dalem bebrapa lamanja itoe prampoewan tida kaloewar manerdjang padanja. Sebab sabagitoe lekas ia dapet denger di sabelah loewar ada Kee Sian dan Tio Poo poenja soewara, jang lagi mengepoeng pada Pang Jan, ia lantas berseroeh: „Kadoea engko, djangan lepaskan itoe pendjahat lari.” Kamoedian ia lantas balik kombali dalem kamarnja dan memboeka peti boewat mengambil iapoenja Ngo-sek-bic-hoen-pee. Lantaran apa Pang Jan poenja djiwa djadi bisa katoeloengan. Kaloe boekannya itoe salampe tersimpan dalem peti, satoe kali ia keboetken itoe barang, tentoe sekali Pang Jan lantas roeboe pangsan dan djika satoe kali ini ia tertangkep lagi tentoe orang tida maoe berlakoe moera padanja.

Pang Jan soeda tentoe sadja tida ada itoe napsoe boewat bertanding lebih lama sama itoe doewa pendjahat, lantas sadja ia berlompat kaloewar dari kalangan teroes merat ka djoeroesan depan. Ia berlompat naek ka atas gentengnja itoe roemah blakang da^u liwati woewoengannja, kamoedian ia menoejdjoe ka kamar pinggir jang di sabelah Barat, jaitoe di sabelah blakangnja itoe kamar boekoe poenja lataran. Oleh kerna itoe soewara riboet di sabelah blakang ada begitoe keras, orang-orang jang lagi berada di depan semoewa dapet denger hal itoe. Pang Jan liat dari itoe kamar boekoe ada kaloewar bebrapa orang, pertama Lou Khay, kadoewa Tjoei Liong dan katiga Louw Tien; semoewa menengtung sendjata terhoenoes.

„Louw Hiantec, mari ikoet padakoe,” berseroeh Pang Jan, jang sahabisnja berseroeh lantas meneroesken perdjalanannja di atas genteng roemah. Ia lompatin itoe woewoengan dari roemah depan dan berlompat toeroen di sabelah loewarnja pintoe depan. Dari mana ia teroes lari ka djoeroesan Selatan, di mana ada terletak satoe gombolan poehoen jang itoe waktoe kaliatannja itam sabagi djoega halimoen. Baroe sadja Pang Jan masoek ka dalem itoe oetan ketjil, kira-kira bebrapa belas tindak djaoenja, sama-sekali ia tida njana di sitoe ada berdjongkok satoe orang, jang dengen tida banjak bitjara lagi, lantas sadja menendang padanja, hingga ia djadi djato meloso dan menjaboet golok maoe membatjok padanja.

FATSAL XII.

Tatkala sapasang kamanten masoek ka kamar, dalem kamar boekoe ada disediaken satoe medja santapan dan minoeman. Louw Tien berdoedoek di tengah-tengah, di tempat besar berdoedoek Tjoei Liong, sedang di sabelah bawah manemenin toewan roemah, Lou Khay. laorang sembari makan dan minoem sembari pasang omong. laorang menanjaken Louw Tien poenja kampoeng kalahiran di mana dan siapa iapoenja sobat-sobat, sateroesnja bagimana ia bisa berkenaan sama Pang Jan dan sabaginja. Louw Tien ada satoe pamoe¹da djoedjoer, jang tida bisa mendjoesta, sekali poen ia kasi djawaban dengen menjimpang sabrapa djaoe jang ia bisa, toch lama-kalamahan iapoenja omongan djadi bertentangan sendirinja. Hal mana soeda membikin Tjoei Liong djadi terprandjat dan heran. Di laen fihak Lou Khay lebih siang soeda denger itoe anak moeda poenja omongan jang tida tjotjok satoe satoe sama laen, maka ia lantas kasi tanda dengen lirikan pada Tjoei Liong. Kamoedian iaorang lantas pada terbangkit dan kaloewar dari itoe kamar. Louw Tien denger di sabela blakang soeda terdjadi gerakan apa-apa, maka itoe waktoe ia lantas poera-poera sinting dan menepok medja.

„Omongan jang baik selamanja tida taoe dibitjaraken di blakang orang,“ kata ia. „Djika kae orang maoe ada omongan apa-apa, mengapa tida maoe dibitjaraken sadja di hadapan kae poenja Louw Toaya?“

Tjoei Liong lantas balikin kombali badannja sembari mengawasi pada itoe pamoeda. „Sabetoelnja kae she apa?“ menanja ia.

„Kaoepoenja kongtjoe-ya she Louw dan bernama satoe hoeroef Tien dan orang kalahiran Ham-khong-too, kampoeng Louw-kee-Tjhung.“

„Tjan-thian-tjie, Lou Hong, kae poenja perna apa?“ menanja Lou Khay.

„ltoelah akoe poenja ajah,“ kata Louw Tien, jang dalem

sa'at itoe djoega ia lantas menendang pada itoe medja santapan, jang lantas melajang ka djoeroesannja Lou Khay. Masi oentoeng itoe waktoe ia lagi berdiri, maka dengan tjepat ia bisa berkelit, hingga itoe medja berikoet segala piring mangkoknja djadi djato ka satoe pinggirang dengan kadebroekan dan bergombrangan. Ampir sa'at itoe djoega, Lou Khay berlompat kaloewar dari itoe kamar. Tjoei Liong poen toeroet itoe toeladan.

Lou Tien dengan tangan menengteng golok terlandjang mengedjar itoe doewa pendjahat jang itoe waktoe pergi mengambil sendjata. Tapi dalem sa'at itoe djoega orang dari blakang soeda sampe boewat mengasi kabar.

„Siapa ?” menjentak Lou Khay, jang belon bisa kenatin marika itoe.

„Akoee Kee Sian dan Tio Poo,” djawab iaorang dengan berbareng. „Wah, tjilaka, Lou Toako, itoe binatang Pang Jan soeda meloekai pada ade prampoewan.”

„Sekarang akoe baroe mendoesin,” kata Lou Khay dengan goesar, „kita soeda kena ditipoe oleh iaorang.”

Sahabisnja berkata ia lantas soeroe orang-orangnja pasang lentera sabanjak-banjaknja dan pergi mengambil masing-masing poenja gegaman boewat pergi menangkap pada itoe orang-orang jang lakoeken penipoean. Dalem sa'at itoe djoega, kaadahan dalem itoe roemah djadi sanget rioeh dan kaloet. Tida lama kamoedian lentera-lentera soeda dipasang dan dalem itoe waktoe djoega dalem itoe roemah djadi penoeh sama panerangan seperti siang.

„Hajo, tangkep itoe kawanan pendjahat !” berseroeh marika itoe dengan rame.

Djoestroe pada itoe waktoe Lou So Tjin poen dateng memboeroe jang tida ampoen lagi lantas oeroekin engkonja sama tjomelan dan seselan.

„Engko, bagoes sekali kae mengatoer perkara !” kata ia dengan soewara mendongkol. „Akoee sama-sekali tida bisa mengarti mengapa kae bisa berlakoe begitoee tjerobo. Di hari kamoedian apa nanti djadinja sama akoe poenja diri

„dan dimana akoe moesti taro moeka ?”

„Ach, ini waktoe djangan bikin penjeselan jang sama sekali tida ada goenanja,” kata Lou Khay. „Paling perloe kita moesti bisa tangkep itoe doea pendjahat.”

Begitoelah iaorang rame-rame pada memboeroe kaloe ar pintoe depan. Itoe waktoe kaliatan ada doewa orang jang berlari, satoe di depan dan satoe di blakang. Jang di depan Pang Jan dan jang blakangan, boekan laen dari Louw Tien. Sebab koetika ia mendedjar kaloe ar dari kamar boekoe, ia lantas denger soearanja Pang Jan di atas genteng jang mengadjak ia maboer. Begitoelah ia poen lantas berlompat naek ka atas genteng mengikoet Pang Jan. Dan Pang Jan jang kena ditendang orang sampe meloso dalem itoe oetan ketjil, tadinja ia meramken mata boewat menerima oentoeng, tapi blakangan ia taoe orang itoe boekan laen dari Ngai Houw. Ngai Houw sabagimana doeloean soeda dibilang, lantaran maoe pergi ka Hongtjioe boewat mengoendjoe ngin roemahnja ia poenja goeroe; tapi di tenga djalanan ia bertemoe pada Thio Liong, Tio Houw dan Pek Ngothay-thay, dan itoe doewa hauw-wie dari Khay-hong-hoe lantas kasi taoe bahoewa iapoenja goeroe telah brangkat ka kota radja boewat melindoengin pada Siangya. Lantaran apa Ngai Houw djadi mengarti bahoewa ia sama-sekali tida perloe pergi ka Hongtjioe. Maka ia lantas berpamitan sama marika itoe dan boeroe-boeroe teroesken perdjalanannja menoedjoe ka kota radja.

Di sapandjang djalan Ngai Houw serepin apa itoe Kimtjhe taydjin soeda sampe di sitoe atawa belon; tapi selamanja ia dapat djawaban jang itoe Kimtjhe soeda liwat disitoe pada bebrapa hari berselang. Hal mana soeda membikin iboek hatinja Ngai Houw, kerna ia koewatir tida kaberoe mengadep pada baginda keizer dan tida bisa beroleh djabatan negri. Terpaksa ia moesti teroesken perdjalanannja siang malem dengen zonder mengaso. Kaloe sadja ia ada mempoenjai sajak, nistjaja lebih siang ia soeda terbang ka kota radja.

Pada itoe malem, kira djam sapeloeh lebih, djoestoe ia

lagi berdjalan masoek ka dalem satoe rimba ketjil, koenjoeng-koenjoeng ia liat dari seblah Oetara ada mendatengin saorang dengan berlari-lari. Lantaran ia tida kenalin orang ada Pang Jan, lebih doeloe ia menoenngoe sembari berdjongkok, dan koetika Pang Jan liwat di hadepannja, dengan tjepat ia lantas menendang dan pada sasoedanja itoe orang jang ia tendang djato dan tjaboet goloknja boewat membatjok. Ia kenalin orang itoe ada Pang Jan.

„Ach, kiranja Pang Toako,” kata ia.

„Siapa?” menanja Pang Jan dengan girang.

„Ako, Ngai Houw.”

„Ai kae soeda membikin akoe djadi kaget sangat terkedjoet dan soemangatkoe terbang saparo. Ini waktoe akoe tida bisa membri katerangan banjak pada kae, dan mari lah kita pergi menangkap kawan pendjahat”

Djoestroe pada itoe waktoe Louw Tien poen soeda sampe.

„Louw Hiante,” kata Pang Jan, Ngai Hiante ada di sini.

„Sekarang kita bertiga ada sampe tjoekoep boeat lawan itoe kawan pendjahat.”

„Apa itoe prampoewan poenja barang aneh kae soeda beroentoeng dapet ambil?” menanja Louw Tien.

„Saoepamanja akoe soeda bisa dapet ambil, tentoelah akoe tida nanti lari,” kata Pang Jan.

„Kae ini sasoenggoenja tida ada goenanja sama-sekali,” kata Louw Tien. „Pada sasoedanja memboewang begitoe banjak tenaga dan pikiran, toch achirnja tida membawa hasil satoe apa.”

„Barang apa sih?” menjelak Ngai Houw, jang merasa ingin taoe.

Pang Jan lantas kasi ketrangan dengan ringkes, kamoedian ja berkata: „Kaloe itoe prampoewan dateng, kita moesti berdiri di atas angin, dengan begitoe, itoe prampoewan tida bisa goenaken iapoenja wasiat. Itoe barang aneh diseboet Ngosek-bie-hoen-pee, jang perloe moesti mendapat angin boewat membawa baenja obat jang tersimpem dalem itoe selampe.

Maka kaloe ia tida berdiri di atas angin, nistjaja ia sendiri poen moesti djato pangsang.

„Wah, begitoe poenja lihay!“ kata Ngai Houw.

Begitoeelah itoe tiga orang lantas kaloewar dari itoe rimba ketjil, tida lama kamoedian iaorang liat dari kadjaoehan ada sinar lentera-lentera jang sanget terang dan soewara goemoeroehnja orang banjak jang mendatengin. Lou Khay, Tjoei Liong, Kee Sian dan Tio Poo berdjalan di depan, di sabelah blakang berdjalan Lou So Tjin dengan di-iringken oleh orang-orangnja jang bersendjata lengkap dan membawa banjak lentera.

Dalem sakedjapan sadja iaorang soeda mengoeroeng pada itoe tiga orang, jang soeda tentoe sadja lantas bikin perlawanan dengan keras dan sengit.

„Kita orang moesti menoedjoe ka Barat-oetara,“ berseroeh Pang Jan, „tapi djangan ka Timoer-selatan. Sebab itoe prampoewan ada mempoenjai itoe barang aneh, dengan begitoe, tentoe ia tida nanti bisa goenaken.“

Ini omongan soeda membikin Lou So Tjin djadi sanget goesar. Iapoenja halis djadi berdiri, matanja mendelik dan moeloetnja dirapetken sembari menggigit gigi. Sebab itoe waktoe biar poen ia bawa itoe salampe aneh, toch tida bisa digoenaken lantaran itoe salampe adjaib, tentoe ia sendiri jang lebih doeloe moesti rebah. Apa boleh boewat ia moesti berunding dengan mengandel sama iapoenja kapandean silat.

Djoestroe pada waktoe pertempoeran sedang sengitnja, dari sabelah Oetara kombali kadengeran soewara riboet-riboet dan kaliatan ada bebrapa banjak lentera dan obor jang menjala dengan terang. Sedang itoe kawanang orang jang mendatengin ada jang djalan kaki dan ada djoega jang menoenggang koeda. Maka itoe soewara jang bergoemoeroeh ada kadengeran djoega soearanja koeda-koeda jang berboenji dengan rame. Samingkin lama itoe pasoeakan orang djadi samingkin dateng dekat. Ngai Houw pikir djoemblanja orang jang samingkin banjak tida terlaloe dikoewatirin, tapi selamanja orang moesti hati-hati sama itoe prampoewan poenja salampe adjaib.

Tapi ternyata itoe kawan orang jang mendatengin ada kawan sendiri, sebab doewa di antaranja jang djalan paling depan ada Liong Tho dan Yauw Beng, sedang di blakang iaorang ada mengikoet itoe bebrapa kapala oppas dari Khay-hong-hoe, Han Tjiat, Touw Soen dan kawan-kawannya, ka-moedian ada kaliatan lagi sapaasang teng jang ditoelisin bebrapa hoeroef: „Tjo-kio-tien Tjongpeng“.

Doeloean, koetika Liong Tho dan Yauw Beng meninggalkan roemahnja Lou Khay, iaorang mentjari satoe tempat sepi dan menanjaken pada saorang toewa, bahoewa ini tempat terbawah dalem kakoewasahannja pembesar mana.

„Pembesar civil atawa pembesar militair?“ balik menanja itoe orang toewa. Itoe doewa orang pikir, lantaran perkara menankep pendjahat tentoe sadja ada lebih baik bereroesan sama pembesar militair.

„Di straat jang dinamaken Siauwan-tee ada terletak kantooranja Tjongpeng,“ manerangken lagi itoe orang toewa. „Dan itoe Tjongpeng taydjinn she Yo.“

Pada sasoedanja hatoerken trima kasi, itoe doewa orang lantas menoejoe ka itoe straat jang dioendjoekin. Tapi koetika iaorang sampe di sebelah loewar kantooranja itoe Tjongpeng, koenjoeng-koenjoeng ia denger dari kadjaohan ada orang jang meneger: „Liong Toaya, toenggoe doeloe sabentaran.“

Koetika Liong Tho berpaling lantas dapet liat ada bebrapa poeloeh orang jang menghamperi, doewa antaranja mengangkat kadoewa tangan membri hormat.

„Akoerasa Liong Toaya tida kenalin kita orang,“ kata salah-satoe di antaranja. „Baroesan kaer soeda mendapet perkara jang sanget mengagetken.“

Liong Tho awasi itoe doewa orang dengan terliti, tapi ia tida bisa inget siapa adanja marika itoe.

„Toewan berdoewa tjara bagaimana bisa kenal pada akoe?“ menanja Liong Tho. „Apa akoe bisa mendapet taer toewan berdoewa poenja she dan nama jang moelia?“

„Akoer bernama Han Tjiat,“ kata itoe orang jang tadi bi-

tjara. „Sedang ini ada akoe poenja kawan sadjabat Touw Soen. Kita orang menerima prentahnja Siangya dateng ka sini boewat menjelidikin itoe pendjahat-pendjahat jang telah lakoeken pemboenoehan toedjoe djiwa manoesia dan perampasan dalem roemah panggadean Heng Hin. Ini hari koetika toewan berdoewa memboeka pertoendjoekan silat di gredja Thian Tjee, kae berdoewa kena ditangkep oleh orang-orangnja Lou Khay.

„Boleh djadi toewan tida bisa kenalin lagi padakoe, tapi akoe masi bisa kenali pada toewan. Doeloean boekantah toewan soeda perna dateng ka Khay-hong-hoe boeat mentjari pada Han djiya, Han Tjiang? Blakangan kae mendjoewal golok dan kita poenja Pang Loya telah kasi persen oewang pada kae. Inilah sebabnja maka akoe bisa kenalin pada toewan. Oleh kerna kita merasa koewatir toewan-toewan sekalian mendapet bahaja, sekarang kita dateng ka sini atas prentahnja pembesar district boewat minta pindjam balatentara negri aken goena membantoe kita orang menangkep pada itoe pendjahat-pendjahat dan sekalian menoeoengin pada kae orang sekalian. Tida njana bisa bertemoe sama kae berdoewa di sini. Apatah toewan poenja oeroesan dateng ka sini?“

Liong Tho lantas toetoerken dengan ringkes apa jang soeda terdjadi.

„Itoloh kabetoelan sekali,“ kata Han Tjiat. „Marilah kita sama-sama pergi mengadep pada Tjongpeng taydjing Yo Peng Boen“.

Begitoelah itoe empat orang sama-sama pergi katemoeken toekang djaga pintoe di kantoornja itoe Tjongpeng, jang lantas masoek kasi kabar pada madjikannja. Tida antara lama, itoe empat orang dipanggil masoek boewat mengadep. Han Tjiat lantas trimaken itoe soerat dienst dari Tikoan, sedeng Liong Tho lantas toetoerken apa jang soeda terdjadi. Itoe Tjongpeng dengan lantas soeroe officier sabawahannja bikin persiapan pada iapoenja pasoeakan balatentara dan koetika ampir djam sapoeloeh iaorang lantas brangkat menoeojoe ka

roemahnja Lou Khay. Di satengah perdjalanana ada bebrapa spion pasoeakan jang balik mengasi kabar, bahoewa di sabelah depan, deket satoe gombolan poehoen, orang-orang dari koelawarga Lou lagi bertaroeng sama tiga orang. Liong Tho dan Yauw Beng satelah mendenger itoe kabar, lantassadja berseroeh dengen keras dan madjoe ka depan dengen tjepat.

Yo Peng Boen Tjongpeng lantassadja kaloewarken prentah soepaja pasoeakan balatentaranja terpentjar mengoeroeng me-roepaken satoe kalangan boender dan djangan kasiken barang satoe pendjahat bisa melariken diri. Ia sendiri lantassadja toeroen dari iapoenja toenggangan dan membawa iapoenja satoe toembak pandjang, madjoe menerdjang pada orang-orangnja Lou Khay jang lagi mengeroeboetin Pang Jan, Louw Tien dan Ngai Houw. Di laen fihak itoe pasoeakan balatentara negri, lantassadja madjoe menjerang dan tangkep-tangkepin itoe kawanan pendjahat.

Samentara Han Tjiat dan Touw Soen pimpin iapoenja orang-orang mengikoeti Liong Tho dan Yauw Beng membri bantoean pada itoe tigi orang jang lagi dikepoeng, jang satelah mendapet taoe marika itoe ada orang-orang sendiri, lantassadja djadi sanget girang dan bersoemangat. Liong Tho satelah meliat pada Lou So Tjin, hatinja merasa djerih dan tida brani bertarang padanja, sebab ia poen soeda taoe bahoewa itoe prampoewan ada mempoenjai „ilmoe gaib.“

„Hei, kaeo orang sekalian,“ berseroeh Pang Jan, „moesti berdiri di sabelah Barat-oetara dengen mengadep ka Timoer-selatan, tapi djangan sabalijnja, sebab itoe prampoewan ada mempoenjai salampe aneh jang sanget berbahaya.“

Dalem itoe waktoe djoega semoewa orang lantassadja menoe-roeti sabagimana omongannja Pang Jan. Di antara marika, Yauw Beng jang paling heibat serangannja, sebab iapoenja gembolan jang berat dan tenaga besar, saban kali bertemoeng dengen moesoeh poenja sendjata, tentoe sang moesoeh poenja gegaman djadi terlempar lantaran terlepas dari tangannja. Orang-orangnja Lou Khay koetika meliat ada dateng pa-

soekan balatentara negri, jang mengoeroeng pada iaorang, semoewanja djadi sanget katakoetan dan tida bernapsoe boewat bertanding lebih djaoe dan baroe sadja iaorang berniat pandjangken kaki dan merat, mendadak iaorang katemoeken Youw Beng jang begitoe lihay, lantaran apa tida ada barang satoe orang jang brani madjoe mendekatin. Tapi, djika iaorang maoe merat poen tida bisa, sebab soeda terkoeroeng oleh balatentara negri dari segala djoeroesan. Taro kata iaorang bisa menerobos dari kepoengan, toch achirnja ia moesti kena tertangkap djoega oleh pasoeakan balatentara jang berkoeda, jang semoewanja menggoenaken sendjata pandjang. Taro kata tida terkena sendjatanja itoe soldadoe koeda, toch iaorang tida nanti bisa terloepoet dari terdjangannja itoe bintang to nggangan.

Yo Tjongpeng jang madjoe menjerang sama iapoenja sabatang toembak poen soeda membikin ripoeh pada orang-orangnja Lou Khay. Tjoema sadja ia tida bisa kenalin jang mana itoe orang-orang jang mendjadi kawannja Liong Tho dan Yauw Beng.

„Hei, mana dianja itoe orang-orang jang mendjadi kita poenja kawan?“ berseroeh itoe pembesar militair.

„Ini tiga orang semoewanja ada kita poenja kawan,“ saeet Liong Tho.

„Kita jang berada di Barat-oetara semoewa ada kita poenja kawan,“ berseroeh Pang Jan. „Kaoe poen haroes bertempat di sini sama kita-orang, djangan sekali berdiri di Timoer-selatan.“

Yo Peng Boen tida mengarti mengapa kawan sendiri moesti pada berdiri di Barat-oetara, sedang itoe kawan pendjahat pada berada di Timoer-selatan. Ia pikir di itoe djoeroesan djika tida ada orang jang mendjaga, bila kawan pendjahat pada lari ka itoe djoeroesan, djadi tida ada jang menghalangin. Ia fantas ambil poetoesan maoe mendjaga di itoe djoeroesan, sebab ia sampe pertjaja bahoewa iapoenja toembak ada tjoekeop boewat diandelin bertanding sama itoe kawan pendjahat. Tjoema sajang ia tida mengatahoci bahoewa

Kioe-bwee-sian-ho poenja ngo-sek-bie-hoen-pee sanget lihay.

Lou So Tjin jang dari satadian masi belon bisa meloekai djoega pada lawanannja sedang, iapoenja salampe adjaib poen tida bisa mendapat koetika boewat digoenaken, sebab selamanja diperingetken oleh iapoenja „soewami“ itoe. Sekarang ia meliat Yo Tjongpeng menjegat di djoeroesan Timoer-selatan dengan tida menghilangkan lagi tempo, ia lantas kaloe-warken iapoenja salampe aneh dan dikeboetken ka djoeroesannja itoe pembesar militair. Dalem sa'at itoe djoega, Yo Tjongpeng mengaloe-warken satoe treakan dan teroes roeboe ka moeka boemi dalem keadahan pangsan, dan iapoenja toembak djoega lantas terlepas dari tangannja. Kim-kak-lok, Kee Sian, koetika menoleh dan dapet liat Yo Tjongpeng roeboe, lantas sadja balikin badannja dan mengajoen iapoenja golok bersedia boewat membatjok. Tapi dalem sa'at itoe djoega kadengeran banjak orang pada berseroeh: „Tjong-peng taydjinn soeda roeboeh!“

Pang Jan meliat itoe bahaja hatinja sanget iboek dan moelœtnja tida brentinja menjomel: „Akoed soeda bilang kaed dateng ka sini, mengapa kaed tida maed denger orang poenja advies!“ Tapi ia tjoema bisa menggroetoe dan tida bisa berboewat satoe apa boewat membri pertoeloengan. Berbareng dengan itoe, Yauw Beng poen soeda dapet liat itoe bahaja dan ia taoe kaloe maed pergi menoeloengin tentoe tida kaberoed. Ia lantas inget sama iapoenja tempoeling, dengan tjepat ia ambil satoe dan timpoekin ka djoeroesannja Kee Sian. Ampir dalem sa'at itoe djoega Kim-kak-lok mengaloe-warken satoe treakan sakit dan lantas roeboe di dekatnja itoe officier, sebab iapoenja sabelah poendak soeda tertantjap oleh Yauw Beng poenja tempoeling.

Semoewa soldadoe pada memboeroed boewat membri pertoeloengan pada iapoenja officier, sekalian iaorang lantas ringkoes pada Kee Sian jang soeda tida berdaja lantaran loekanja. Kamoedian dengan lekas iaorang gotong itoe doewa orang ka djoeroesan Barat-oetara, sebab takoet sama Lou So Tjin poenja salampe aneh.

"Awat, semoewa orang moesti berdiri di djoeroesan Barat-oetara!" memperingetken lagi Pang Jan.

Lou So Tjin djadi mati akal dan tida bisa goenaken lagi iapoenja ngo-sek-bie-hoen-pee. Ia memboeroe pada itoe kawananan soldadoe jang menggendong Yo Tjongpeng dan menggotong Kee Sian, tapi lebih siang ia soeda ditjegah oleh Ngai Houw. Begitoelah iaorang lantas bertempoer dengan seroeh dan sama-sama pandenja, hingga tida kataoean siapa jang lebih koewat.

Itoe waktoe, Lou Khay dan orang-orangnja, biar poen tida semoewanja kena ditangkep oleh balatentara negri, tapi katinggalan tida brapa belas orang sadja dan koetika meliat kaadahan djadi samingkin tida baik, iaorang poen tida brani bikin perlawanan lebih djaoe, hanja pada lari saraboe-tan menerobos kaloewar kepoengan. Lou Khay dan Tjoei Liong meliat orang-orangnja soeda tida katinggalan barang satoe soeda tentoe sadja hatinja merasa sanget takoet. Pertama Tjoei Liong jang mentjari koetika boewat merat. Ia membatjok ka djoeroesanja Liong Tho, tapi ampir dalem sa'at itoe djoega ia tarik poelang sendjatanja dan balikin badannja merat ka djoeroesan Selatan.

Sapandjang lari Tjoei Liong teroes berpikir, samingkin pikir ia djadi samingkin katakoetan. Djangan kata ia dan kawanja tida bisa menang bertanding sama Pang Jan dan kawan-kawanja, tentoe sadja Lou Khay tida nanti bisa mengampoenin padanja, sebab ia soeda terbitken kaonaran jang boekan ketjil berhoeboeng sama iapoenja perboewatan jang tjomblangin Pang Jan pada Lou So Tjin; tapi taro kata ia dan kawan-kawannja bisa beroleh kamenangan, toch ia tida ada itoe moeka boewat bertemoe lagi sama Lou Khay. Menoeroet keadahan di ini waktoe, biar poen ia menggorok leher sendiri djoega, ia tida nanti bisa teboes dosanja pada familie Lou. Tida ada lagi laen djalan selaennja ia moesti maboer ka tempat djaoe.

Itoe waktoe ia katemoeken bebrapa soldadoe jang menjegah iapoenja djalanan, ia lantas ajoen goloknja dan bikin

roeboeh doewa antaranja. Blakangan satoe soldadoe koe-
da memboeroe padanja, kombali ia batjok dan roeboeken
itoe soldadoe ka moeka boemi. Sekarang tida ada orang
brani mengoeber lagi padanja, maka ia bisa maboer dengan
tida terhalang.

Itoe waktoe Lou Khay jang masi teroes bertempoer, liat
iapoenja fihak, berikoet ia sendiri tjoema katinggalan tiga
orang sadja, jaitoe iapoenja ade prampoewan dan Tio Poo.
Hal mana membikin ia djadi sangat iboek dan mendongkol.
Ia taoe ini oeroesan semoewa lantaran gara-garanja Tjoei
Liong. Ia pikir, djika kamoedian bertemoe sama itoe orang,
tentoe ia moesti bikin peritoengan. Boewat sekarang tida ada
laen djalan salaennja adjak ade prampoeannja melolos ke-
loear dari kepoengan.

Tapi itoe waktoe Kioe-bwee-sian-ho telah mendapet satoe
pikiran. Dari badannja ia kaloewarken kertas jang digoem-
pelken dan lantas disoempel ka dalem iapoenja lobang idoeng.
Achirnja ia kaloewarken iapoenja ngo-sek-bie-hoen-pee dan
dikeboetken pada orang banjak, tida perdoeli ia lagi berada
di atas angin atawa boekan.

FATSAL XIII.

Djoestroe pada itoe waktoe di djoeroesan Bara-selatan ada kadengeran soewara riboet-riboet dan berlompat masoek bebrapa orang gagah. Pertama Tian Him Hoei, kadoewa Louw Hong, di'ikoeti oleh Tji Kheng, See Him, Beng Khay, Tjiauw Tjia dan In-tiong-Ho, Goei Tjin. Kadatengannya itoe orang-orang soeda membikin itoe bebrapa djago moeda djadi bersoemangat.

Tian Him Hoei dan kawan-kawannya djadi pemboeka djalan bagi Gan Sin Bin jang brangkat ka kota radja boewat merapportken iapoenja pakerdjahan. Pada saban tempat jang iaorang sampeken ada dikasi prentah boewat sediaken kongkoan aken goena Gan An-ic. Pada itoe hari, kombali orang banjak moesti menoeroeti kainginannya Tji Kheng, jang pada saban kali tida bisa tidoer poeles, lantas maoe brangkat kapan ia mendapat pengrasahan moesti brangkat dan semoewa orang terpaksa moesti mengiringi iapoenja kahendakan. Orang banjak lantaran menginget Tji Kheng ada saorang kasar jang soesa diadjak beroeroesan, dengan apa boleh boewat menoeroetin sadja iapoenja segala kainginan.

Itoe malem, baroe sadja liwat tengah malem, Tji Kheng soeda riboet soeroe orang sediaken koeda-koeda boewat lantas brangkat. Orang banjak dengan apa boleh boewat toeroet sama-sama brangkat. Pada sasoedanja sampe di djalanan baroe kataoean itoe waktoe masi terlaloe pagi; tapi lantaran soeda katelandjoeran brangkat terpaksa orang moesti landjoetken itoe perdjalanan. Tida antara lama kamoedian iaorang menampak di sabelah depan ada banjak sinar panerangan teng dan obor dan soera goemoeroehnja orang banjak. Bebrapa pengikoet disoeroe pergi tjari taoe ada terdjadi perkara apa. Satelah iaorang mendapat taoe itoe bebrapa orang lantas toeroen dari masing-masing poenja toenggangan dan minta Tjoe-pou, Kong Soen Tjek—jang itoe waktoe poen djalan bersama-sama—menoenggoe doeloe sama itoe pengikoet-pengikoet di soeatoe tempat.

Tian Him Hoi dan laen-laennja dengan menghoenoes sen-
djata pada memboeroe ka itoe tempat pertempöeran. Sasam-
penja iaorang lantas dapet liat Louw Tien, Pang Jan dan
laen-laen lagi mengepoeng doewa lelaki satoe prampoewan.

„Bagoes, kabetoelan sekali taydjin sekalian dateng,” ber-
seroeh Pang Jan. „Ini bebrapa orang semoewanja ada pen-
djahat-pendjahat jang melakoeken kadosahan besar dan tida
boleh dikasi lolos.”

Lou So Tjin mendenger orang menjeboet taydjin, taoe jang
itoe orang-orang jang baroe dateng ada ponggawa-ponggawa
negri; tapi lantaran ia pikir masi ada itoe ngo-sek-bie-hoen-
pee, sedeng itoe waktöe ia soeda soempel iapoenja lobang
idoeng, sedikit poen ia tida merasa keder atawa djerih. Dalem
sa'at itoe djoega ia lantas keboet-keboet iapoenja salampe
aneh itoe dan dalem sakedjapan sadja ada bebrapa banjak
soldadoe jang lagi mengepoeng pada djato roeboe dalem
kaädahan pangsang.

Lou So Tjin lantas manerdjang ka djoeroesan di mana
Ngai Houw berdiri, orang siapa lantaran meliat itoe waktöe
ada begitöe banjak soldadoe jang pada roeboe, sedeng Pang
Jan tida brentinja berseroeh menjoeroe orang berdiri di sa-
belah Barat-oetara, lantaran apa Ngai Houw djadi goegoep
dan tida taoe apa jang ia moesti berboewat. Beroentoeng
pada sabelonnja terdjadi perkara jang tida enak, Pang Jan
jang tjerdik soeda dapet satöe akal baroe.

„Toewan-toewan sekalian moesti pidjit lobang idoeng!”
kata ia, „sebab ini prampoewan mengeboetken iapoenja
ngo-sek-bie-hoen-pee.”

Dalem sa'at itoe djoega semoewa orang djadi mendoesin
dan lantas pada memidjit masing-masing poenja lobang idoeng.
Sedeng soldadoe-soldadoe poen pada berseroeh pada kawan-
kawannja: „Hajo, pidjit lobang idoeng! Pidjit lobang idoeng!”

Hal mana soeda membikin Lou So Tjin djadi sanget ter-
kedjoet. Sebab ia sekarang tjoema mengandel sadja pada itoe
salampe aneh boewat lolosken diri dari kepoengan, tapi tida
njana kombali itoe „soewami” jang soeda bikin petjah iapoc-

nja resia, hingga itoe daja djadi gagal lagi. Lou Khay jang tadinja mengandel sama ade prampoewannja poenja ngo-sek bie-hoen-pee, tapi sekarang itoe salampe sama-sekali tida bisa bakerdja sabagimana moestinja, soeda tentoe sadja ia tida sanggoep membelaken diri lebih lama lagi.

Ampir dalem sa'at itoe djoega Lou Khay poenja golok kena dibin poetoes oleh In-tiong-Ho poenja pedang wasiat. Ia balikin badannja dan merat; tapi disoesoel oleh Yauw Beng poenja tempoeling jang mengenaken iapoenja betis kaki dan teroes roeboe ka moeka boemi. Soldadoe-soldadoe lantas memboeroe dan ringkoes padanja. Lou So Tjin jang meliat gelagat tida baek, lantas maboer dan oentoeng bagi ia, lantaran ada mempoenjai tindakan pesat djadi bisa djoega terlolos dari oeberannja orang banjak.

Tiat-thoei-ho, Tio Poo, jang saäntero soemangetnja ditompahkan pada Lou So Tjin, sabagitoe lekas meliat itoe prampoewan jang jang ia tjintaken maboer, ia poen lantas pandjangken kakinja mengikoeti dari blakang. Apa tjilaka ia berpapasan sama Goei Tjin. Dalem sakedjap sadja In-tiong-Ho soeda bikin poetoes goloknja itoe pendjahat sama iapoenja pedang wasiat, kamoedian itoe orang pertapahan batjokin pedangnja ka djoeroesan kapalanja iapoenja moesoeh jang soeda tida bersendjata. Beroentoeng Tio Poo bisa berkelit dengan tjepet, tapi tida oeroeng iapoenja kaen boengkoesan kapala djadi poetoes saparonja. Dengan penoeh pengrasaän kaget dan takoet Tiat-thoei-ho lari sipat-koeping.

Achirnja Tio Poo bisa socioel djoega pada Lou So Tjin dan lantas iaorang sama-sama djalan. Kita tinggalken doeloe pada marika itoe jang aken ditoeterken lagi kamoedian bila soeda sampe waktoenja.

Itoe orang-orang dari Khay-hong-hoe meliat itoe kawan pendjahat sabagian soeda kena tertangkap dan sabagian lagi pada maboer, lantas iaorang pada berkoempoel di soeatoe tempat. Orang-orang jang perna moedahan, seperti Louw Tien, Pang Jan, Ngai Houw dan laen-laennja memberi hormat pada orang-orang jang perna toewahan. Satoe sama laen toe-

toerken masing-masing poenja perdjalan. Hal mana soeda membikin Tian Him Hoi mendjadi sanget girang.

„Kaloe sadja kita soeda bisa mendapat taoe di mana siang-yang-Ong berada,” kata ia, „semoewa oeroesan gampang diatoer.”

„Apa kae taoe siapa jang soeda melakoeken itoe perampokan dan pemboenoehan di dalem roemah penggadean Heng Hin?” menanja Pang Jan pada Han Tjiat.

„Tida, sebab ini perkara masi belon bisa diselidikin dengan djelas,” djawab itoe kapala oppas.

„Salah satoe di antaranja soeda tertangkap, jaitoe Kee Sian,” manerangkan Pang Jan; „tapi jang satoe soeda maboer sama Lou So Tjin, jaitoe Tio Poo.”

Slandjoetnja Pang Jang lantas toetoeerken apa jang ia soeda denger dari itoe doewa pendjahat sendiri, koetika masi berada di roemahnja Lou Khay.

„Betoel koerang-adjar sekali,” kata Tian Him Hoi dengan goesar, „dalem waktue negri begini aman itoe doewa pendjahat brani sembarangan sadja memboenoeh begitoe banjak djiwa manoesia, tjoema lantaran orang tida mae menoeroetin iaorang poenja permintahan menggade barang dalem harga jang boekan-boekan. Haroes sekali iaorang moesti dikasi hoekoeman jang sanget berat. Baroesan akoe liat itoe Tjongpeng taydjinn telah djato pangsannja, sekarang bagaimana, apa soeda sedar atawa belon?”

„Soeda moelai sedar,” kata bebrapa orang.

Itoe waktue bebrapa soldadoe datang mengasi rapport laorang poenja kawan-kawan ada ampat jang mati dan anem mendapat loeka berat dan enteng; sedeng fihak moesoeh telah tertawan ampatpoeloeh doewa orang dan bebrapa belas jang mendapat loeka berat.

„Ini waktue kae poenja officier, Tjongpeng taydjinn, lantaran baroe sedar dari pangsannja, djadi tida bisa mengasi prentah pada kae orang,” kata Tian Him Hoi „tapi apa kae orang kenalin akoe atawa tida?”

Itoe bebrapa soldadoe lantas pada berloetoet di hadepannja

Tian Tjiauw dan ampir dengan berbareng iaorang berkata :
„Kita orang semoewa kenal pada Tian taydjin dan maoe menoeroet taydjin poenja segala prentah.”

„Nah, kaloe begitoe akoe maoe talangin kasi prentah atas namanja ka oe orang poenja taydjin,” kata lagi Tian Tjiauw.
„Ini kawan an pendjahat, jang masi idoep dan mendapat loeka, semoewanja moesti dibawa ka kantoer, berikoet djoega ini doewa pendjahat jang mendjadi kapala, orang siapa kamoe moedian kita orang maoe bawa ka kota radja. Sedeng marika jang soeda tiwas djiwanja, boleh soeroe kapala kampoeng panggilin koeli-koeli boewat dikoeboer.”

Pada sasoedanja Tian Him Hoei mamerintah, Kong-soen, Tjek dan itoe kawan an pengikoet jang menoenggoe di sabelah sana soeda pada dateng menghamperi. Tida lama kamoedian Yo Peng Boen Tjongpeng djoega soeda djadi sedar betoel dan lantas djalanken peradatan pada orang banjak. Tian Tjiauw kasi taoe, bahoewa baroesan ia soeda toeloeng atoerken apa jang perloe. Yo Tjongpeng manggoetken kapalanja menjataken setoedjoe.

„Ako e rasa lebih baek taydjin sekalian sadja beslag semoewa barang miliknja Lou Khay,” kata lagi Tian Him Hoei
„Apabila masi ada orang-orangnja jang katinggalan moesti ditangkep semoewanja dan dibawa ka kantoer boewat didenger iaorang poenja katerangan.”

Yo Boen Peng lantas mengepalai iapoenja pasoe kan solda doe pergi ka roemahnja Lou Khay boewat melakoeken itoe pembeslaghan. Di laen fihak Tian Tjiauw dan laen-laennja menoedjoe ka kantoornja itoe Tjongpeng dan kira langit soeda mendjadi terang, baroelah Yo Tjongpeng balik poelang. Ia kasiken pada Tian Tjiauw staat dari barang-barang ang dibeslag, jang aken diteroesken pada Khay-honghoe; tapi semoewa orang dalem roemahnja Lou Khay soeda pada maboer djadi tida ada jang bisa tertangkep lagi.

„Itoelah tida perloe ditjari lebih djaoe,” kata Tian Him Hoei. „Ako e harep sadja taydjin soeka soeroe orang sediaken satoe kreta pendjara jang aken digoenaken boe-

wat membawa Lou Khay dan Kee Sian ka Khay-hong-hoe."

Pada sasoesanja semoewa diatoer beres, itoe semoewa orang sama-sama brangkat ka kota radja dengan mengiringken itoe kreta-pendjara. Tatkala iaorang sampe ka kantoer Khay-hong-hoe, Ngai Houw boeroe-boeroe menoedjoe ka tempatnja hauw-wie boewat katemoeken iapoenja goeroe, ka moedian jang laen-laen djoega pada katemoeken Hek-ho-lie, saling menanjaken satoe sama laen poenja kasehatan dan menoetoerken masing-masing poenja perdjalan. Blakangan Heng Djoe Liong dan Heng Djoe Houw djoega dateng katemoekan orang banjak.

Di laen fihak Han Tjiat dan Touw Soen lantas masoek katemoeken Pauw Kong dan toetoerken apa jang soeda kadjadian. Itoe ambtenaar manggoetken kapala dan soeroe itoe doewa kapala oppas menoenggoe di kantoer.

Tjie Kheng sabegitoe lekas bertemoe sama Tie Hoa lantas sadja bikin riboet.

"Tie Hoa hiantee," kata ia, "kaoe ini pinter sekali, sabagitoe lekas oeroesan soeda mendjadi beres, lantas sadja kaeo maboer. Taydjinn lantaran anggep kaeo tida aken dateng ka kota radja, maka soeda soeroe kita orang mentjari kaeo di sapandjang djalan. Tida taoenja kaeo soeda mendoeloein dateng ka sini.... Ai, tjoba kaloe boekannja kaeo dateng ka sini, nistjaja Siangya poenja djiwa soeda binasa."

Itoe omongan soeda membikin Heng Djoe Liong dan soe-dara moedanja djadi sanget kamaloean hingga moekanja berobah djadi merah. Tapi iaorang tida brani banjak omong, hanja toendoekin sadja marika poenja kapala dengan boengkem. Koenjoeng-koenjoeng keree pintoe terboekana dan Pauw Hin bertindak masoek. Semoewa orang pada saling membri hormat sama itoe boedaknja Pauw Kong jang dipertjaja.

"Siangya telah mendapet kabar bahoewa toewan-toewan sekalian telah sampe di sini," kata itoe boedak. "Sekarang Siangya menoenggoe di dalem kamar-boekoe boeat bertemoe sama toewan-toewan sekalian."

Tian Tjiauw adjak itoe bebrapa pamoeda pergi ka kamar

batja boewat bertemoe sama Pauw Kong. Itoe pembesar tanjakan satoe per satoe apa jang soeda kadjadian di Siangyang-hoe dan djoega itoe perkara di Thian Tjee Bio. Achirnja itoe ambtenaar bitjaraken prihal Heng Djoe Liong dan soedara moedanja jang maoe lakoeken pemboenoehan dan bagimana Kok In Hoei soeda bantoein menangken pada itoe doea orang, tapi ia itoe soeda brangkat poelang, lantaran tida maoe mendjabat pakerdjahan negri. Pada sasoedanja tida ada apa-apa lagi jang diomongin, Pauw Kong minta itoe orang-orang menoenngoe di dalem iapoenja kantoran sebab ia hendak preksa itoe doewa pendjahat jang baroe dibawa dateng.

Koetika Pauw Kong berdoedoek di depan iapoenja medja pengadilan, lantas kasi prenta oppasnja boewat bawa mengadep doeloe Lou Khay dan koetika ia ditanja atas iapoenja segala perboewatan jang tida patoet, itoe pendjahat toemplek semoewa kadosahan atas dirinja Tjoei Liong, Kee Sian dan Tio Poo. Blakangan dibawa mengadep Kee Sian jang lantas berloetoet dan mendjoera di hadapan itoe medja pengadilan. Bermoela ini pendjahat poen tida maoe mengakoe, tapi pada sasoedanja Pauw Kong djadi goesar, baroelah ia akoeh semoewa kadosahannja dan bagimana asal-oesoelnja itoe pertjektjokan, tapi ia poen timpaken semoewa kasalahan atas dirinja Tio Poo sebab katanja iapoenja kawan jang lakoeken itoe semoewa pemboenoehan, sedeng ia sendiri tjoeima „soenhong“ atawa membantoein liat-liat kaloe ada orang dateng pergokin kawannja poenja perboewatan.

Pauw Kong poen tida maoe goenaken perkakas kompes, hanja soeroe oppas-oppasnja masoekin sadja itoe doewa pendjahat ka dalem pendjara, menoenngoe sampe laen-laen kawannja tertangkep baroelah perkaranja dikasi poefoesan. Di laen fihak ia kasi persen pada itoe bebrapa oppas jang melakoeken itoe pakerdjahan, sabagimana doeloean soeda didjandiiken. Ia soeroe djoega djoeroetoelisnja menoenngoe soerat-soerat dienst boewat menangkep pada Tjoei Liong dan Tio Poo dan dikasi prentah djoega pada pembesar di Tjo-

kio-tien, bahoewa semoea harta-bandanja Lou Khay jang soeda dibeslag moesti teroes didjadiken miliknja negri; sedeng gredja Thian Tjee moesti ditjariken lagi laen pengerooes jang baik dan sekarang itoe tanah-tanah di sakiternja itoe gredja, tida lagi djadi miliknja Lou Khay, hanja djadi miliknja itoe gredja sendiri dan segala hasilnja boleh dipake onkost merawati itoe roemah berhala. Orang-orangnja Lou Khay jang telah toeroet bikin kariboetan, semoewanja dikasi hoekoem rangket dan dilepas; tapi djika kamoedian iaorang brani berboewat djahat lagi tentoe aken dikasi hoekoeman lebih berat.

Sekarang kita tengok pada Gan Sin Bin jang sadari lama kita tinggalkan. Satrimanja firman keizer, segala oeroesan ia oeroes dengen menoeroeti kainginannja itoe firman. Kim Tihoe diwadjibken mengoeroes oeroesannja bangsa Biauw, dan pendjahat-pendjahat jang dapet ditangkep dari dalem astananja Siangyang-Ong, seperti Seng-thioe-tay-seng, Teng Kie, Tjan-in-gan, Sin Hou, jang doeloean telah tjoba lakoe-koeken pemboenoehan dan jang blakangan mentjoeri tjap kabesaran, maka semoewanja telah dikasi hoekoeman tabas batang leher, sedeng iaorang poenja kapala dipantjer di atas pintoe kota Siangyang jang sabelah Barat. Dan itoe soldadoe-soldadoe Ong-hoe jang tertangkep, semoewa dikasi kabebasan.

Pada satoe hari Liok Pin dan Louw Eng dari Tan-khibong dateng ka kantoornja An-ic minta mengadep pada Gan Sin Bin. Tatkala orang bawa ia mengadep pada itoe ambteenaar, lantassadja itoe doewa orang berloetoet dengen tida maoe bangoen sembari trima dosa.

„Toewan berdoewa ada berdosa apatah?“ menanja Gan Sin Bin dengen heran.

„Doeloean kita ada menerima Tjio Soe-loya poenja prentah boewat mendjaga Peh Khi jang dipasrahken pada kita berdoewa,“ kata itoe doewa orang dengen berbareng „dan di atas kapalanja Peh Khie ada ditaroin samatjem obat jang bisa membikin orang djadi pangsang, jaitoe Bie-hoen-yo-piah, tapi siang dan malem kita orang moesti tjekokin doewa

sendok aer tadjin. Tjoema sadja lantaran soeda terlaloe lama roepanja Peh Khi tida bisa telan lagi itoe aer tadjin, tapi kita orang tida brani angkat itoe obat dari kapalanja. Ini hari kita dapet kanjataan toeboenja itoe orang soeda dingin seperti ijs dan kakoe sebagi djoega satoe mait. Oleh kerna itoe, kita lantas braniken hati boewat mengangkat itoe bie-hoen-yo-phia jang ditaro di atas emboen-emboenannja, tapi ternjata soeda kasep, sebab lebih siang ia soeda poetoes djiwa. Kita orang tida brani melantjingin mengoeboer, maka sekarang datang mengadep minta taydjin poenja prentah."

Gan Sin Bin lantas mengelah napas pandjang dan berkata: „Sajang, sajang sekali, sebab dengan begitoe ia djadi bisa terlepas dari hoekoemannja negri. Kae berdoewa djangan ka mana-nana, nanti ikoet akoe masoek ka kota radja boewat menoenggoe firman keizer dan menerima djabatan negri."

Kamoedian Gan Sin Bin prentah bebrapa orang sabawahannja pergi ka Tan-khie-bong boewat mengambil maitnja Peh Khi dan disoeroe diboewang di antara djoerang goenoeng soepaja dimakanin oleh boeroeng-boeroeng dan oeloeng-oeloeng. Koetika itoe doewa orang maoe berangkat sama itoe orang-orang soeroehannja Gan Sin Bin, Tjhio Peng lantas menjegat dan minta kembali itoe obat Bie-hoen-yo-piah, jang lantas dikasiken oleh Louw Eng.

Kamoedian ada datang masoek satoe penggawe mengasi taoe pada Kong-soen Tjek, oleh siapa dirapportkee pada Gan Sin Bin, bahoewa Pek Ngo-thay-thay menerima firman keizer boewat mengambil djinazatnja Pek Giok Tong, jang tersimpenn dalem itoe goetji porcelein koena, tida lama lagi tentoe bakal sampe ka sini. Gan Sin Bin lantas prentah pada tikoan boeat diriken satoe tetarep di sabelah loewarnja kantor An-ie, di mana ditaro itoe goetji jang terisi djinazat dengan disembajingin dan mengandoeng bebrapa banjak hweeshio dan saykong boewat batjaken kitab soetji.

Kamoedian Gan Sin Bin mengepalai semoewa ambtenaar civil dan militair bikin sembajangan pada djinazatnja itoe orang gagah.

Tida berselang bebrapa hari, Pek Ngo-thay-thay bersama iapoenja poetra toenggal jang masi moeda, Pek Hoen Soei soeda dateng dan lantas bikin sembajang di itoe tetarep. Gan Sin Bin katemoeken Pek hoedjin dan memboedjoeck dengan perkatahan manis, serta peringetken soepaja pimpin Pek kongtjoe sekola dengan betoel, soepaja kamoedian bisa mendjadi orang jang ternama. Blakangan ia soeroe anterken sadjoembla oewang boewat onkost sembajang. Begitoelah Pek hoedjin lantas berangkat membawa djinzatnja iapoenja soewami, jang aken dikoeboer di iapoenja kampoeng kalahiran.

Gan Sin Bin poen lantas berangkat poelang ka kota radja. Semoea ambtenaar civiel dan militair di itoe kota pada menganter dan sediaken segala kantaran jang perloe. Sedeng orang-orang jang toeroet membantoe bikin petjah Tong-bong-tien, semoewa mengiring pada itoe ambtenaar. Tjiong Hiong dari Koensan bersama le Gie dan le Sia bawa iaorang poenja balatentara poelang ka goenoengnja. Itoe semoewa ambtenaar dari kota Siangyang menganter sampe satoe post djaoenja, baroe pada balik kombali. Di hari jang berikoetnja, Tjhio Peng atoe orang-orang mendjadi tiga rombongan. Rombongan pertama, Tian Tjiauw, Goei Tjin, Tji Kheng, Louw Hong, See Liang, Beng Khay, Tjiauw Tjia bersama Kongsoen-tjek djalan doeloean ; sedeng Gan Sin Bin dalem iapoenja djoli kabesaran dianter oleh djago-djago moeda, seperti Tji Liang, Pek In Seng, Him Wic, Han Liang, Peh Giok dan Han Thian Kim, koetika iaorang lagi berdjalan sampe di satoe rawah jang banjak alang-alangnja, mendadak ada berlompat kaloewar satoe orang ka djoeroesan djolinja Gan Sin Bin, jang lantas menoesoek sama iapoenja satoe golok terhoenoos.

FATSAL XIV.

Di sapoeternja itoe rawah ada toemboe banjak sekali pe-poehoenan dan itoe tempat diseboet Hek-tjhioe-kong dan itoe orang jang berlompat kaloewar sembari menoesoek di moeloetnja berseroeh: „Wan-ong!” sabagian djoega orang jang hendak meminta kaadilan. Ia memake pakean rombeng, tapi itoe pakean ada sanget ringkes. Tatkala ia menoebroek ka djoeroesan itoe djoli sembari menjeboet „wan-ong”, baroe sadja Giok Bek maoe toeroen dari koeda toenggangannja dan itoe djoli belon kaboeroe ditoeroenken ka moeka boemi, tapi lebi siang itoe orang soeda mengaloewarken satoe golok jang tida terlaloe pandjang, sedeng sabelah tangan jang laennja memboeka kerenja itoe djoli, berbareng dengan itoe, tangannja jang memegang golok ditoesoekin ka dalem itoe djoli.

„Aja!” kadengeran soewara orang berseroeh jang diboentoetin sama tjipratannja darah. Kabetoelan sekali itoe waktoe orang-orang jang melindoengin pada Gan Sin Bin ada Him Wie, Han Liang, Peh Giok dan Han Thian Kim, ampat orang mana ilmoe kapandean silatnja tida terlaloe bagoes, terlebih lagi Han Thian Kim jang tida mempoenjai laen kapandean salaennja iapoenja tenaga besar.

Itoe pemboenoeh boekan laen dari Siam-tian-tjhioe, Hwan Thian Poo, jang doeloean dieber-oeber oleh Tjhio Peng dan maboer dengan mengambil djalan dari aer. Blakangan di waktoe siang Hwan Thian Poo tida brani poelang ka roemahnja. Doewa hari kamoedian, di waktoe malem, baroelah ia brani poelang. Tapi ia dapet kanjatahan roemahnja ditoe-toep dan didjaga oleh orang-orang politie. Soeda tentoe sadja ia tida brani masoek, malah ia tida brani pergi ka Louw-kee-tjoen. Terpaksa ia mengoempet doeloe di dalem roemahnja iapoenja familie.

Dengen perlahan ia serepin dan dapet taoe bahoewa Louw Sie Kiat poenja ajah-angkat ada Tjhio Peng. Dengan sanget sakit hati dan gergetan ia berniat hendak bikin pembalesan pada Hoan-kang-tjie. Semoewa orang taoe bahoewa Tjhio

Peng bakerdja sabagi pelindoeng dari Gan Sin Bin. Maka ia lantas brangkat ka Siangyang dan kabetoelan sekali di tengah perdjalanannya ia bertemoe sama Hong-bian-long, Tjoe Eng. Iaorantg lantas pergi ka satoe waroeng arak boewat pasang omong dengan laloewasa. Tjoe Eng lantas kasi taoe bahoewa Siang-yang-Ong ini waktoe ada di negri Lenghee dan lagi panggil koempoel semoewa orang gagah dan pande di saloeroe negri boewat terbitken pembrontakan dan mereboet karadjahan Song.

Hwan Thian Poo poen lantas toetoerken ia sendiri poenja oeroesan.

„Och, itoelah kabetoelan sekali, djika kae mae mentjari pada Tjhio Peng,” kata Tjoe Eng. „Kae boleh djalan sama-sama kae, kae pergi boenoeh Tjhio Peng dan kae jang membantoein pasang mata di satoe pinggirannya. Kamoedian kae jang pergi memboenoeh Gan Sin Bin dan kae bantoein liat-liat boewat kae..”

„Kaloeg begitoe bagoes sekali, kae mendapet satoe tenaga bantoean,” kata Hwan Thian Poo. „Tjoema apa sebabnja kae mae memboenoeh pada Gan Sin Bin?”

„Kae ini sasoenggoenja bodo sekali,” kata Tjoe Eng. „Gan Sin Bin ada Ong-ya poenja moesoeh besar dan barang siapa jang bisa memboenoeh padanja, Ong-ya mae kasi ia kadoedoekan tinggi dan mendapet bagian saparo karadjahan Song.”

„Kaloeg begitoe,” kata Hwan Thian Poo jang goblok, „kae sendiri djoega bisa boenoeh mati itoe doewa orang, maka kae tjoema perloe toeloeng bantoein liat-liat sadja di satoe pinggirannya.”

Pada sasoedanja itoe doewa pendjahat berdami dengan beres lantas bajar harga makanan dan minoeman, kamoedian iaorang menoejdjoek ka Hek-tjhioe-kong. Iaorang denger pendoedoek di sitoe lagi rame bitjaraken prihal itoe tida lama kamoedian Gan Tay-djan aken sampe di itoe tempat, maka ada bebrapa banjak orang lagi bikin bresih djalanan. Hal mana soeda membikin girang pada itoe doewa pendja-

hat. Iaorang lantas preksa kaādahannja itoe tempat, di mana jang baik boewat iaorang melakoeken marika poenja pakerdjahan boesoek.

Lantaran ia taoe bahoewa Gan Sin Bin selamanja ada membawa banjak pengikoet dan orang-orang jang melindoengin padanja, laloe iaorang membeli saprangkat pakean toewa boewat dipake oleh Hwan Thian Poo agar bisa menjingkirken orang poenja katjoerigahan dan ia bisa lakoeken perboewatannja dengan tida terhalang. Sebab menoeoet anggepannja Tjoe Eng, satoe kali Gan Sin Bin dapet di-boenoeh, biar poen pengikoetnja banjak, tapi djika soeda tida ada kapalanja tentoe marika djadi pada riboet dalem kaādahan kaloet. Sedeng Tjoe Eng jang tjerdik bilang, ia maoe menoenngoein dan kamoedian membantoein dari antara itoe gombolan alang-alang jang lebat dan tinggi.

Begitoelah iaorang menoenngoe di antara itoe alang-alang, sebab kabetoelan sekali itoe rawah aernja kering, djadi iaorang bisa mendekam di sitoe dengan tida oesa koewatir kabasahan. Iaorang dari tempat jang tersemboeni bisa meliat ka tempat djaoe dengan terang dan tida oesa koewatir kataboehan orang. Tida antara lama iaorang liat dari kadjaeohan ada mendatengin satoe djoli kabesaran jang diiringin oleh bebrapa banjak orang jang djalan kaki maoe poen berkoeda. Koetika itoe rombongan ampir sampe, lantas sadja Hwan Thian Poo berlompat kaloewar sembari mamegang golok terlandjang dan moeloetnja menjeboet „wang-ong“. Itoe toekang-toekang menggotong djoli sama-sekali tida mendoega bahoewa ini orang ada satoe candidaat pemboenoeh, maka iaorang lagi maoe toeroenken itoe gotongan djoli ka moeka boemi, tapi lebih siang itoe orang soeda memboeka kerenja itoe djoli dibarengin sama satoe toesoekan golok ka dalem djoli itoe. Maka itoe toekang-toekang djoli lantaran kaget lantas sadja lepaskan marika poenja gotongan dan pada lari dengan katakoetan.

„Tjilaka! ada orang memboenoeh pada taydjini!“ berseroh Han Thian Kim, tapi tjoe ma moeloetnja sadja riboet,

biar poen di pinggangnja ada tergantoeng satoe golok, toeh ia soeda loepa tjaboet.

Him Wie, Peh Giok dan Han Liang satelah mendenger Han Thian Kim berseroeh baroe inget menghoenoes golok, tapi itoe pemboenoh lebih siang soeda pandjangken kakinja maboer sakeras-kerasnja. Itoe tiga orang mengoeber dari blakang. Hwan Thian Poo tadinja berniat tida maoe bikin perlawanan, tapi sama-sekali ia tida sangka di sabelah depan lebih siang soeda ada saorang jang menjegat. Itoe orang memake pakean dari soetra idjo, paras moekanja berwarna hitam, jang ditimpalin sama sapasang halis poetih dan mata jang bersorot tadjam dan moeloet jang sedikit lebar. Di tangannja ada memegang satoe golok jang di gagangnja ada memake satoe tjintjin. Itoe waktoe ia gerakin goloknja dan mengandang di orang poenja perdjalanan.

„Hei, manoesia jang hina-dina, djangan lari!” kata orang itoe, „kaoe poenja aki sadari lama soeda menoenngoe di sini.“

Orang itoe boekan laen dari San-see-gan, Tji Liang, jang tadinja lagi doedoek dalem satoe kreta sama Say-koan-lok, Goei Tjiang, sembari pasang omong dan koetika meliat kaadahannja itoe tempat, di sapoeternja ada gombolan poehoen dan tida djaoe dari sitoe ada satoe rawa jang penoeh sama alang-alang tinggi dan lebat.

„Ini tempat akoe rasa tida baek, Goei sianseng,” kata ia pada kawannja.

„Mengapa tida baek?” menanja sang kawan.

„Sekarang pada waktoe siang masi tida mengapa, tapi kaloe di waktoe malem ada bagoes sekali digoenaken sebagai tempat mengoempetnja pendjahat jang maoe berlakoe hianat.“

„Kita orang sekolahan tida mengarti hal itoe.“

Itoe waktoe Tji Liang toedjoeken pemandangannja ka djoeroesan itoe rawa alang-alang, lantassadja ia dapet liat ada doewa bajangan orang jang bergerak-gerak. Dengen tida memboewang lagi tempo ia berlompat toeroen dari kanda-

rannja dan tjepetken tindakannya ka itoe djoeroesan. Djoestroo pada itoe waktoe ia kasomplokan sama Hwan Thian Poo jang maoe merat. Tji Liang lantas berlompat dan mengan-dang di djalanannya itoe pemboenoeh.

Hwan Thian Poo belon kenal ini orang Sansee poenja ka-lihayan, dalem saät itoe djoega ia lantas menjerang sama goloknja jang lantas ditangkis oleh si halis poetih. „Trang!“ itoe pendjahat poenja sendjata djadi terpoetoes doewa. Dalem saemoer hidoepnja Hwan Thian Poo belon perna katemoeken sendjata jang saroea itoe. Soeda tentoe sadja ia tida brani bikin perlawanan lebih djaoe, hanja balikin badannya dan oeloer kakinja ka djoeroesan itoe rawah alang-alang.

Tji Liang lantas kaloewarken iapoenja piau, tapi koetika ia lagi pasang itoe sendjata resia di tangannya dan bersedia boewat ditimpoeken, itoe pendjahat soeda menjelesap di antara itoe alang-alang jang lebat dan tinggi. Djika menoe-roet Peh Giok, Him Wie dan Han Liang, maoe mengoeber teroes ka dalem itoe gombolan alang-alang, sebab Gan tay-djin soeda diboenoeh mati oleh itoe pemboenoeh, dengan begitoe iaorang poenja kadosahan—lantaran terledor—boekannya ketjil. Tapi dalem saät itoe djoega, Pak-hiap dateng memboeroe dan beroelang-oelang gerakin tangannya boewat menjega.

„Soeda, djangan dikedjar teroes,“ kata ia. „Kita orang lebih perloe pergi tengok taydjin poenja kaädahan.“

Itoe tiga orang lantas balik kombali. Tapi Tji Liang kedipin matanja dan menoeendjoek iapoenja idoeng sembari kasi tanda sama tangan, kamoedian ia lantas mengedjar dengan menoeeroeti sapandjang sabelah loewarnya itoe rawah alang-alang. Di laen fihak Auw-yang Tjhoen bersama Pek In Seng pergi panggil itoe toekang-toekang djoli jang tadi pada lari seraboetan boewat beresken lagi itoe djali jang iaorang soeda lemparken. Koetika kerenja itoe djoli diboeka dan liat pada orang jang berdoedoek dalem itoe djoli, ternjata itoe toesoekan mengenaken di poendaknja itoe penoempang djoli dan darahnya berlepotan sakoedjoer badannya.

Pak-hiap kaloewarken saboengkoes obat boeboek jang dipakein di loekanja itoe orang, kamoedian mamesen bebrapa perkatahan serta angkat sedikit itoe orang poenja pakean kabesaran jang dipake. Achirnja Pak-hiap kasi prentah pada itoe toekang-toekang djoli boewat menggotong teroes. Orang jang berdoedoek di dalem itoe djoli masi teroes kasi denger iapoenja soewara rintihan tida brentinja. Jang paling loetjoe adalah itoe kawan soldadoe pengiring, biar poen iaorang semoewa bersendjata golok dan toembak pandjang dalem iaorang poenja costum militair, tapi koetika meliat ada pemboenoeh jang menjerang pada iaorang poenja taydjinn, semoewanja pada lari saraboetan dengan katakoetan, sama-sekali tida ada itoe hati boewat pergi menangep pada itoe pendjahat. Tapi blakangan pada sasoedanja meliat itoe pemboenoeh merat, baroelah iaorang pada datang berkoempoel kembali dan iaorang masi ada itoe katebelan moeka boewat menanjaken katerangan pada Pak-hiap apa taydjinn poenja loeka berat atawa enteng. Masi ada doewa officier tingkatan rendah bersama doewa pengikoetnja jang berdjalan doeloean, itoe waktoe poen datang memboeroe dan menanjaken katerangan pada Auw-yang Tjhoen.

Pak-hiap lantas gertak marika itoe sama bebrapa patah perkatahan keras, sahingga itoe officier-officier bersama soldadoe-soldadoenja pada moendoer dengan tida brani memboeka soewara. Iaorang teroes disoeroe menganter pada taydjinn dau dipesen sekarang moesti lebih hati-hati. Giok Bek, Gan Sin Bin poenja boedak jang setia, kaliatannja tinggal senang di atas iapoenja koeda toenggangan, sama-sekali tida perloeken toeroen tengok pada iapoenja madjikan, hal mana soeda membikin Him Wie dan kawan-kawannja djadi sanget heran dan tida bisa mengerti.

Boewat djangan bikin pembatja djadi bingoeng, baeklah diterangkan apa sebabnja orang tida mendjadi iboek atas terdjadinja itoe perkara boenoeh. Orang jang berdoedoek dalem itoe djoli kabesaran, sama-sekali boekannja Kimtjhe jang sedjati. Hal mana ada dari boewah akalnja Tjhio Peng

jang tjerdik. Tatkala maoe menoedjoe ka post jang kadoewa, seperti di atas soeda diterangkan itoe orang-orang dibagi mendjadi tiga rombongan. Lebih doeloe dengen resia ada diminta pada Kim Tihoe, soepaja pasrahken satoe orang hoekoeman jang aken digoenaken boewat menjamar sebagai Gan Sin Bin tetiron. Apabila di sapandjang djalan tida terdjadi bahaya apa-apa, iapoenja kadosahan—jang soeda dipoetoesken hoekoeman mati—aken dikasi kabebasan. Sabaliknja djika ia mendapet tjilaka sampe mati, itoelah dasaran iapoenja peroentoengan jang takdirnja moesti mati. Apa maoe dikata.

Ini akal ada jang taoe, tapi ada djoega jang tida dikasi taoe. Orang-orang kasar jang sabangsanja Him Wie dan laen-laennja, dianggep tida perloe dikasi taoe itoe resia. Dari sebab itoe djoegalah iaorang djadi sanget kaget dan iboek, sedeng Giok Bek jang taoe terang hal itoe, soeda tentoe sadja sama-sekali ia tida mendjadi kaget atawa koewatir. Sampe di satoe post pembrentian itoe Kimtjhe tetiron diganti lagi sama saorang hoekoeman laen, tapi sateroesnja tida ada terdjadi apa-apa jang tida di'ingin. Tatkala iaorang sampe di kota radja, tida lama kamoedian Gan Sin Bin jang sedjati poen sampe ka itoe iboe kota. Tjoema Tji Liang jang sampe blakangan. Sebab koetika ia mengoeber pada itoe pemboe-noeh, ternjata tida bisa katjandak, entah ka mana ia soeda maboer.

Dari sebab Gan Sin Bin sasampenja di kota radja bertempat di gredja Tay Siang Kok, semoewa orang pada dateng mengadep ka itoe gredja. Di hari jang berikoetnja itoe ambtenaar aken masoek ka kraton mengadep pada baginda keizer. Tjhio Peng dan laen-laennja pergi mengadep pada Pauw Kong di Khay-hong-hoe, tapi pada sablonnja katemoeken itoe ambtenaar ia katemoeken doeloe pada Tie Hoa, jang teroes masi berada di itoe kantoor.

„Ha ha ha! Bagoes sekali kae poenja perboewatan, Tie hianteece,” kata Hoan-kang-tjie. „Kae ini bisa dioepamakan sabagi satoe naga sakti jang kaliatan kapalanja tapi tida bisa

kaliatan boentoetnja.“

„Ach, Tjhio sieko, djangan terlaloe memoedji padakoe,“ kata Hek-ho-lie.

„Akoë ingin taoë apa sekarang kaoë maöë katemoeken pada taydjïn apa tida dan apa kaoë maöë trima atawa tida kalöë kaoë dikasi koernia djabatän negri.“

„Kalöë sampe begitöë, akoë poen tida ada daja boewat menöelak teröes. Sekarang lebih baik kaoë pergi mengadep pada Siangya.“

Itoë waktöë Tie Hoa adjar kenal Tjhio Peng pada Heng Djöë Liong dan Heng Djöë Houw. Kamoedian Tjhio Peng tarik Hek-ho-lie ka satöë pinggiran dan bitjara bisik-bisik di koepingnja.

„Kaoë ini sasoenggoenja brani sekali,“ kata ia. Ini doewa candidaat pemboenöeh kaoë soeda brani poedjiken boewat bakerdja di Khay-hong-höë, kalöë sadja kamoedian iaorang poenja pikiran berbalik lagi, apa kaoë tida taoë kaoë bakal mendapet kadosahan apa?“

„Kaoë poenja omongan ada benar sekali,“ kata Tie Hoa dengén perlahan. „Moelanja akoë tida dapet pikir sampe di sitöë, tapi blakangan poen akoë djadi menjesél dan merasa koewatir. Inilah djoega sebabnja maka akoë tinggal teröes di sini perloenja boeat menilik pada iaorang. Tjoema sadja dalem ini bebrapa hari akoë soeda bisa dapet oesoet djoega ia berdoewa poenja tabeat dan perangï. Sieko, kaoë boleh legaken pikiran, pasti sekali tida nanti terdjadi perkara jang tida terdoega.“

„Kalöë begitöë memang paling baik,“ kata Tjhio Peng. „Sekarang kita orang maöë pergi katemoeken Siangya.“

Begitöëlah iaorang masöek mengadep pada itöë ambtenaar.

„Sekarang baik diseboet djoega namanja itöë doewa soe-dara Heng dalem soerat rapportän pada baginda keizer,“ kata Pauw Kong, „bahoewa iaorang poen ada toeroet membantöë bikin petjah Tong-bong-tin dan kasi voorstel soepaja iaorang dikasi djabatän negri.“

„Akoë mengiringken sadja Siangya poenja kahendakan,“

kata Tjhio Peng jang manggoet-manggoetken kapala oendjoek satoedjoenja.

„Tjiong Hiong di Koensan telah membawa brapa banjak orang?“ menanja lagi Pauw Kong.

„Tjiong Hiong dari Koensan tjoema membawa doewa orang,“ manerangken Tjhio Peng „sedeng jang laen-laennja ada iaorang poenja pengikoet.“

Pauw Kong pesen soeroe Tjhio Peng bawa itoe tiga orang dari Koensan dateng mengadep padanja dan bawa Heng Djoe Liong dan soedara moedanja pergi mengadep pada Gan Sin Bin di Tay Siang Kok Sie. Sasampenja Hoan-kang-tjie kasi taoe apa jang baroesan Pauw Kong soeda bitjaraken. Itoe doewa soedara Heng lantas berloetoet di hadepan Gan Sin Bin memoehoen itoe ambtenaar poenja kamoerahan hati. Gan Sin Bin manggoetken kapalanja dan soeroe itoe doewa orang berbangkit. Tjhio Peng kasi taoe djoega bahoewa Pauw Kong soeroe ia bawa Tjiong Hiong dan doewa kawannja mengadep ka Khay-hong-hoe, soeda tentoe sadja diloloesken.

Tjhio Peng adjak Tjiong Hiong, le Sia dan le Gie sampe di sabelah loewar kamar boekoenja Pauw Kong dan pada sasuedanja ia kasi taoe bahoewa itoe tiga orang sekarang soeda menoenggoe di loewar, baroelah ia adjak marika itoe masoek teroes ka dalem itoe kamar batja. Itoe tiga orang lantas berloetoet dan mendjoera di hadepannya itoe minister, jang soeroe itoe tiga orang mengangkat masing-masing poenja kapala.

Menoeroet Pauw Kong poenja doegahan, Tjiong Hiong jang mandjadi kapala dari Koensan dan mempoenjai doewapoeleoh ampat benteng-benteng darat dan aer, tentoelah ada saorang jang moekanja garang dan bengis. Sebab orang jang beroman begitoe sadja baroe bisa mempoenjai tjoekoep pengaroeh boewat mendjadi kapala dari satoe goenoeng jang loewasnja delapan ratoes lie pasegi. Tapi sekarang satelah ia meliat sendiri romannya itoe Tjee-tjoe, dengen tida merasa lagi hatinja djadi merasa heran. Sebab iapoenja paras moeka

bresih dan menjenangkan, di bibir dan djanggoetnja ada memake koemis dan djenggot pendek. Pakeannja poen ada banjak mirip sama orang sekolahan jang lemah-lemboet.

Koetika Pauw Kong mengawasi pada Kim-tong-boe-tek-tay-tjiang-koen, le Sia, hatinja djadi sanget kagoem. Toeboenja ada lebih dari satoe toembak tingginja, warna koelit moekanja seperti emas moeda, sedeng iapoenja dandanan sabagimana biasanja orang gagah di itoe djeman. Kapalanja besar dan poendaknja lebar. Blakangan koetika ia mengawasi pada le Gie, mendadak iapoenja hati mendjadi sedih. Iapoenja roman jang tjakep, boleh dibilang ampir seperti romannja satoe gadis, dalem iapoenja dandanan Boe-seng-siang-kong, berdjaeohan sama romannja Pek Houw-wie, Giok Tong. Kamoedian itoe ambtenaar tanjakan iaorang poenja nama satoe per satoe dan Tjhio Peng di satoe pinggirang gantiken iaorang mengasi djawaban.

„Poen-kok denger kae dalem examen ilmoe soerat soeda perna mendapat gelaran tjinsoe,“ kata Pauw Kong, „dan dalem ilmoe militair dapet gelaran thamhwa, tapi kliroe sekali kae soeda bikin persakoetoean di Koensan. Itoelah dinamaken pinter kabelinger.“

„Akoel tida bisa poengkir atas akoe poenja kadosahan,“ kata Tjiang Hiong, „dan itoe kadosahan ada besar sekali.“

„Apabila orang berboeat kasalahan bisa lantas merobah, toelah masi boleh dibilang saorang jang berboedi. Sekarang kae orang boleh balik poelang ka Tay Siang Kok Sie boeat menoenggoe baginda keizer poenja firman.“

Itoe tiga orang lantas mendjoera, kamoedian berbangkit mengikoet Tjhio Peng kaloear dari itoe kamar. Tjhio Peng tjari Tie Hoa boeat diadjak sama-sama pergi ka gredja terseboet. Tapi ia katemoeken satoe penggawe jang dengen bersenjoem hatoerken satoe soerat padanja.

„Soe Loya,“ kata itoe penggawe, „Tie Toaya telah pergi kaloear dan lantaran ia koeatir kae mentjari padanja, ia soeda soeroe akoe menoenggoe di sini, djika akoe berte-moe sama kae, ia soeroe akoe trimaken ini soerat.“

Tjhio Peng samboeti itoe soerat dan sa'at itoe djoega ia djadi melengkap, sebab dalem pikirannja ada berklebat apa-apa."

"Tjilaka!" berseroeh ia, „banjakan tentoe ia maboer lagi."

Sembari berkata begitoe sembari batja boenjinja itoe soerat, ternjata Hoan-kang-tjie poenja doegahan tida kliroe, sebab begini boenjinja :

„Soerat dihatoerken ka hadapan Tjhio Sieko,

„Makanja akoe tinggal lamahan di Khay-hong-hoe, perloenja boeat menilik pada itoe doewa soedara Heng ; sekarang kae orang semoewa soeda pada dateng, dengen begitoe akoe poenja kawadajiban soeda boleh dilepaskan. Sampe laen hari kita orang bertemoe kombali.

Hormatkoe.

(terteekend) Tie Hoa."

Tjhio Peng sahabisnja membatja lantass membanting kaki sembari mengelah napas.

„Tie hiantee poenja perboewatan sasoenggoenja aneh sekali," kata ia.

Apa boleh boewat ia bersama Tjiong Hiong, le Sia dan le Gie menoejdje ka gredja Tay Siang Kók, sasampenja ia mengadep lagi pada Gap Sin Bin dan toetoerken apa jang baroesan telah terdjadi, kamoedian ia hatoerken itoe soeratnja Tie Hoa. Gan Sin Bin satelah membatja poen lantass mengelah napas. Semoewa orang jang berada di sitoe djoega pada toeroet mengelah napas.

Gan Sin Bin prentah Goei Tjiang menoeelis satoe rapport persediaan boewat besok mengadep pada baginda keizer. Namanja semoewa orang ada diseboet dalem itoe rapport, di antaranja, Louw Hong, Tji Kheng dan Tjhio Peng minta idjin brenti dari dari djabatannja, hal mana ada ditoelis terang djoega dalem itoe rapport. Gan Sin Bin preksa kombali itoe rapport jang ditoelis oleh iapoenja secretaris, ternjata ada betoel dan beres.

Esokan paginja djam tiga Gan Sin Bin memake iapoenja pakean kabesaran dan menoejdje ka kraton dan ia toeroen dari djolinja menoeenggoe di kamar tempat menoeenggoe. Tida

antara lama Pauw Kong poen soeda sampe. Gan Sin Bin menghamperi dan memberi hormat dalem tjaranja satoe moerid bertemoe pada goeroenja. Begitolelah iaorang pasang omong dalem itoe kamar peranti menoenngoe. Berselang bebrapa sa'at kamoedian, baginda keizer doedoek dalem iapoenja tacht karadjahan dan semoewa ambtenaar madjoe memberi selamat dengan menoeoeti masing-masing poenja tingkatan pangkat, kamoedian iaorang berdiri berbaris di kadoewa pinggir. Gan Sin Bin poenja rapport dihatoerken oleh Hong-boenkhoa pada Thaykam Tan Lim, oleh siapa ditaro ka atas medjanja baginda keizer, dengan dibeber dan ditindihin oleh tindihan jang terbikin dari singa-singahan emas.

Baginda keizer preksa itoe rapport bebrapa lamanja, kamoedian ia lantas mengaloewaken satoe firman, bahoewa semoewa orang jang telah berdjasa dalem perkara bikin petjah Tong-bong-tin diprentahkan mengadep di satoe paseban jang dinamaken Liong-tou-kok, pada ini hari sasoedanja dahar sora. Gan Sin Bin poenja pakerdjahan dipoedji, katanja ia soeda bakerdja dengan bagoes, dan iapoenja djabatan dikasi naek mendjadi Lee-pou-siang-sie.

Gan Sin Bin mendjoera sanpe kapalanja mengenakan djoebin, bahoewa ia ingin oendoerken diri dari pakerdjahan negri. Tapi baginda keizer tida meloeloesken. Gan Sin Bin kasi katerangan bahoewa lantaran di Siangyang mengoeroes itoe pakerdjahan jang berhoeboeng sama Siang-yang-Ong, ia telah mendapet penjakit moentah darah. Maka ia memoehoen dengan sanget soepaja diperkenanken meletakkan djabatannja. Tapi baginda keizer tida meloeloesken djoega, hanja tjoma dikasi verlot sadja saratoes hari dan disoeroe berobat sembari mengnso dan kamoedian apabila iapoenja waktoe verlot soeda penoeh, ia moesti dateng mengadep lagi dan mendjabat itoe djabatan baroe jang baroe dianoegrahken.

Gan Sin Bin tida brani membantah lebih djaoe. Sebab apabila ia berkeras menocelak itoe djabatan negri, ia bisa dipersalahkan melawan kahendakannja keizer, hal mana, dalem

djeman pamerentahan sawenang-wenang, itoelah ada soeatoe kadosahan jang boekannya ketjil. Maka dengan apa boleh boewat Gan Sin Bin mendjoera boawat hatoerken trima kasi.

FATSAL XV.

Laen dari itoe baginda keizer kasi persen djoega barang emas, perak dan soetra-soetra jang indah. Gan Sin Bin kom-bali mendjoera menghatoerken trima kasi.

Gie-tjian-Soe-pin-toa-too-Hou-wie, Tian Tjiauw, dianoe-grahken pangkat Sam-pin-Hou-wie-Tjiang-koen berikoet djoega barang-barang emas, perak dan soetra-soetra. Louw Hong dan Tji Kheng diperkenanken meletakijn djabatannja, sedeng iapoenja lowongan boleh diteroesken oleh marika itoe poenja anak-anak dan ini doewa orang poen dikasi persen sabagi-mana persenannja Tian Tjiauw.

Han Tjiang dan Tjhio Peng tida di'idjinken meletakijn djabatannja; Han Tjiang di kasi pangkat Soe-pin-Hou-wie, sedeng Tjhio Peng dinaekin satoe tingkatan djadi Soei-han-Sam-pin-Hou-wie-Tjiang-koen, djoega dikasi persen barang-barang jang seperti terseboet di atas tadi.

Gan Sin Bin gantiken hatoerken trima kasi boewat itoe orang-orang jang baroe diseboetken.

Baginda keizer kasi taoe lagi bahoewa itoe orang-orang jang laennja, nanti sabentar malem sahabisnja dahar boleh dateng berkoempoel di Liong-touw-kok dengan tida oesa memake pakean kabesaran dan Liong-touw-kok Tay-hak-soe, Khay-hong-hoe Hoe-in, Pauw Tjin, boleh kapalai iaorang dateng mengadep. Pada sasoedanja baginda keizer selesah menjeboetken iapoenja firman, lantasi moendoer dari tachtakaradjahannja dan semoewa ambtenaar poen pada boebaran.

Pauw Kong koetika balik ka kamar peranti menoenggoe, soeroean Lam-hiap dan Tjhio Peng, soepaja mengadjar pada semoewa orang jang bakal mengadep pada baginda keizer,

tentang adat istiadat dan oepatjara jang perloe, djangan sampe seperti doeloean ada jang telah bikin pelanggaran. Di laen fihak ia prentahken Kong-soen Tjek boewat membikin staat nama-namanja itoe orang-orang berikoet djoega marika poenja gelaran dan kampoeng kalahiran, jang mana kamoe-dian moesti ditrimaken pada Hong-boenkhoa.

Tian Tjiauw dan Tjhio Peng satelah menerima prentahnja Pauw Kong lantas brangkat ka Taysiang-kok-sie, boewat melakoeken prentah itoe. Orang-orang jang otak terang dan tjerdik, satoe kali diadjarin lantas sadja bisa mengarti, tapi jang otaknja poentoel dan goblok, sekali poen berkali-kali diadjar, toch masi salah dan loepa sadja. Tapi, jang paling penting iaorang diperingetcen soepaja bitjara paling sedikit sabisanja, tapi moesti mendjoera banjakan. Sebab pada waktoe mengadep pada baginda keizer orang selamanja moesti merangkang seperti binatang. Blakangan ada dibitjaraken djoega prihal itoe Siauw-ngo-gie dan panggil marika itoe dateng berkoempoel.

„Apabila baginda keizer taoe kae orang ada toeroennanja panglima perang,“ kata Tjhio Peng pada itoe lima soe-dara angkat, „nistjaja aken merasa girang, sebab baginda keizer poenja tabeat soeka sekali menjaksiken ilmoe silat dan lantaran itoe kae orang ada mempoenjai berbagi-bagi matjem ilmoe silat, amat boleh djadi baginda aken soeroe kae orang mempertoendjoekin kae orang poenja kapandean. Maka, menoeroet akoe poenja pikiran, kae orang poenja pikiran, kae orang poenja kapandean apa, haroes diseboetken djoega dalem itoe staat. Apabila kamoedian dengan sa-soenggoenja baginda mae menjaksiken djadi gampang dila-koekennja.“

„Tjhio sieko kae poenja pikiran ada benar sekali,“ kata Tian Tjiauw,

Koetika ditanjaken Louw Tien mae kasi toendjoek ilmoe silat apa, itoe anak moeda bilang ia paling paham goenaken sendjata golok pendek. Ngai Houw bilang ia poen mae kasi toendjoek silat golok pendek, begitoe poen Pek In Seng

dan Tji Liang, semoewanja maoe pertoendjoekin silat golok pendek djoega.

„Wah, kae orang betoel-betoel gelo sekali,” kata Tjhio Peng, „jang satoe maen silat golok pendek, jang laennja poen silat golok pendek, taro kata baginda keizer soeka meliat djoega, lama-lama ten.oe aken mendjadi bosen dan djemoe, maka kae orang moesti kasi pertoendjoekan jang masing-masing berlaenan. Biarlah In Seng sadja jang bersilat golok pendek dan kae, Louw Tien, boekantah kae bisa bersilat sama pedang, kan doeloean kae soeda peladjarken itoe matjem ilmoe pada kae poenja Teng Dji-siok?”

„Bisa si bisa, tapi tapi akoe tida mempoenjai pedangnja,” saet Louw Tien.

„Kae poenja Teng Dji-siok ada mempoenjai satoe pedang,” kata Tjhio Peng, „sedeng kae poenja Tian Tay-siok djoega ada mempoenjai satoe. Salah satoe di antaranja toch kae boleh pindjim pake?”

„Nah, kaloe 'gitoe baeklah,” saet Louw Tien.

„Ngai Houw, kae bagimana?” menanja Tjhio Peng.

„Sekarang akoe pikir maoe bersilat dengan toembak,” saet itoe anak moeda.

„Tjis, anak goblok!” kata Tjhio Peng. „Masatah di hadapan baginda keizer maoe maen toembak, sedeng maenken sendjata pendek sadja sabetoelnja tida boleh!”

„Abis, akoe moesti kasi pertoendjoekan apa?”

„Akoe paling baek kae pertoendjoeken silat tangan kosong sadja.”

„Boleh,” kata Ngai Houw sembari manggoetken kapala.

„Kae, Tji Liang, bagimana?” menanja lagi Tjhio Peng.

„Boekannja akoe boeka moeloet besar,” saet Tji Liang. „delapanbelas matjem sendjata, sietjek boleh seboet sadja jang akoe moesti goenaken.”

„Dan sasocatoe matjemnja kae bisa goenaken dengan paham dan bagoes, akoe rasa?”

„Bagoes si kadanang; boleh djoegalah dan tida sampe dikatawai orang.”

„Salaennja itoe kae ada poenja ilmoe kapandean apa lagi?”

„Ada djoega sedikit,” saet Tji Liang.

„Ilmoe kapandean apa?” menegasken Hwan-kang-tji. „Tjobalah kae seboetken, soepaja bisa ditoeliskan, tjoema sadja moesti jang bagoes dan mengheranken.”

„Sietjek boleh soeroe toelis sadja „satoe tangan bisa melepaskan tiga matjem sendjata resia”, kata Tji Liang.

Tjhio Peng jang tjerdik lantast mengarti Tji Liang poenja maksoed dan taoe djoega bahoewa itoe anak moeda ada mempoenjai itoe tiga matjem ilmoe kapandean.

„Hei, Thian Kim, mari sini; kae bisa apa?” menanja Tjhio Peng.

Itoe orang goblok datang menghampiri sembari tangal-tongol.

„Akoel? Akoel bisa makan,” djawab ia.

„Kae ada mempoenjai ilmoe kapandean apa,” manegasken lagi Tjhio Peng.

„Akoel bisa berboeat apa?” balik menanja si goblok.

„Ja, benar.”

„Akoel bisa membegal,” kata Han Thian Kim.

„Kae maoe pergi membegal pada baginda keizer? Ha ha ha! sampe kapan kae bisa djadi manoesia jang lengkep.”

„Djiko, kae ditanjaken bisa ilmoe kapandean apa, soepaja gampang ditoelis di mana staat nama-nama jang bakal diha-toerken pada baginda keizer,” menjelak Tji Liang.

„Tadi akoel soeda bilang: makan dan membegal,” kata Han Thian Kim, „dan dan oewang pendapatetan membegal digoenaken boewat makan.”

„Soedalah, kae menjingkir dari sini, djangan bikin akoel djadi mendongkol sadja!” menjentak Tjhio Peng.

Si goblok boekannja menerima iapoenja kagoblokan, sabalijnja dengan oering-oeringan dan mengamboel berlaloe ka sabelah Barat.

Tatkala Tjhio Peng kasi taoe pada Kong-soen Tjek boewat

menoelis itoe staat nama-nama, pertama Pek In Seng, bersilat dengan menggoenaken golok pendek ; kadoea Louw Tien bersilat sama pedang ; katiga Ngai Houw bersilat tangan kosong ; kaämpat Tji Liang sabelah tangan bisa melepaskan tiga matjem sendjata resia dan kalima Han Thian Kim ada mempoenjai tenaga besar.

„Tjhio sieko, bagaimana artinja tenaga besar ?” menanja Tian Tjiauw.

„Akoee rasa baginda keizer tentoe mengarti bahoewa kaloe ditoelis begitoe,” kata Tjhio Peng, „tentoelah ia ini ada seorang kasar jang goblok. Lagian akoe taoe tabeatnja baginda keizer soeka sama orang jang tjakep, maka dengan sengadja akoe atoer jang roepanja djelek di sabelah blakang, soepaja kaloe sasoedanja meliat jang doeloean dan liat jang romannja djelek, taro kata baginda tida soeka liat djoega tida djadi apa.”

„Bagimana kae bisa taoe ?” menanja Tian Tjiauw sembari tertawa.

„Doeloean, koetika akoe bertiga soedara mengadep pada baginda keizer, meliat pada akoe poenja Twako, baginda merasa soeka, begitoe poen koetika meliat pada akoe poenja Samko ; tapi koetika meliat padakoe, baginda lantas keroetken halisnja, kamoedian ia menanja pada Siangya, mengapa diseboet Hwan-kang-tji. Akoe lantaran maoe oendjoek akoe poenja ilmoe kapandean, akoe lantas bilang bahoewa akoe lantas bilang bahoewa akoe poenja ilmoe di dalem aer sanget tinggi dan bagoes, lantaran ini, ampir sadja akoe dihoekoem potong kapala. Blakangan baginda keizer prentah akoe menangken „Tjiam” (samatjem kodok besar, jang didjeridinja tida berlamat), jang dilepaskan ka dalem satoe empang. Inilah djoega sebabnja akoe djadi mendapat taoe baginda soeka pada orang jang romannja tjakep atawa garang.”

Tian Him Hoei djadi tertawa besar.

„Sieko poenja pendapatetan, biar poen bisa dikatakan terla-loe berkoewatir, tapi bisa dibilang ada mengandoeng djoega kabeneran,” kata ia.

Itoe waktoe lantass soeroean Kong-soen Tjek bikinken marika itoe poenja daftar nama dengan terang, jang dikirimken doeloe ka kraton, kamoedian bawa iaorang menoedjoe ka Hou-liat-boen boewat menoenggoe keizer poenja panggilan. Di sapandjang djalan banjak sekali orang jang mengikoeti, samingkin lama itoe orang-orang jang mengikoeti djadi saminngkin banjak djoemblanja. Di dalem kota radja kaloe ada terdjadi perkara apa sadja, dalem sakedjapan djadi tersiar di antara orang banjak. Begitoelah pendoedoek itoe kota lantaran mendenger kabar orang-orang jang telah mametjahkan Tong-bong-tien maoe pergi mengadep pada baginda keizer, lantass sadja pada dateng berkroemoen dan mengikoeti boeat menjaksiken bagaimana marika itoe poenja roman. Itoe orang banjak poen mengikoeti sampe di loewarnja Hou-tiat-boen.

Bebrapa orang kebiri jang mendjaga di Hou-tiat-boen, lantaran mendenger soewara orang banjak jang bergoemoeroe lantass pada kaloewar meliat. Koetika meliat pada Tian Tjiauw, Louw Hong, Han Tjiang, Tji Kheng dan Tjhio Peng lantass menghamperi boewat bitjara. Begitoelah satoe sama laen pada djalanken kahormatan sabagimana lajiknya. Tatkala itoe orang-orang masoek, itoe orang-orang kebiri lantaran merasa ingin taoe, menanjaken iaorang poenja nama satoe per satoe.

„Wah, sabentar bila iaorang mengadep pada baginda keizer,” kata salah-satoe antaranja, „akoe tanggoeng iaorang bakal dikoerniaken djabatan negri. Nanti kae orang kaloewar lagi, kita maoe hatoerken slamet pada kae orang semoewa.”

Djoestroe pada waktoe orang lagi omong-omong, dari sebelah dalem ada berdjalan kaloewar doewa taykam ketjil, semoewanja beroemoer antara toedjoebelas sampe sembilanbelas tahun, dalem iaorang poenja costuum jang telah ditapken sedeng iaorang poenja roman semoewanja tjakep dan ampir tida berbeda sebagi anak prawan. Di iaorang poenja tangan mamegang keboetan dari boeloe boentoet koeda, jang dikeboetken sana kamari, di laen fihak moeloetnja berseroeh.

„Mana itoe sekalian Loya dari Khay-hong-hoe?” kata ia-orang dengan berbareng.

Tian Lam-hiap dan Tjhio Peng kenalin marika itoe ada orang kebiri jang djadi soeroehannja baginda keizer, maka iaorang lantas menghamperi dan membri hormat sembari bersenjoem.

„Akoeharep toewan berdoewa ada slamat dan beroentoeng,” kata Tian Tjiauw dan Hwan-kang-tji dengan berbareng.

„Slamat dan beroentoeng sama-sama,” djawab itoe orang kebiri. „Kita berdoewa menerima prentah kita poenja chef dateng ka sini boewat meliat apa toean-toean sekalian soeda dateng berkoempoel semoewanja atawa belon. Apa kadoewa Loya barangkali taoe siapa adanja kita poenja chef itoe?”

„Soeda tentoe sadja taoe,” djawab Lam-hiap, „jaitoe Tan Tjongkwan Loya.”

„Baroesan baginda keizer soeda selesah bersantap, maka akoe harep kadoewa Loya soeka bawa itoe orang-orang jang moesti mengadep.”

„Itoe orang-orang semoewanja soeda berkoempoel di sini,” kata Tjhio Peng. „Kita djoestroe berdiam di sini boewat menoenngoe prentah.”

Itoe doewa orang kebiri lantas memandang pada semoewa orang jang beradadi sitoe. „Apa ini semoewa adai toe orang-orang jang moesti mengadep pada baginda keizeer?” menanja marika itoe.

Tjhio Peng soeroe itoe semoewa orang madjoe ka depan. „Kaoe orang bertemoeh pada ini doewa Loya,” kata ia.

Semoewa orang lantas membri hormat pada itoe doewa taykam, jang lantas membales sabagimana biasanja.

„Kaoe orang menoenngoe sadja doeloe di sini,” kata ia-orang.

Kamoedian itoe doewa orang kebiri lantas balik masoek lagi ka dalem. Tida antara lama ada dateng Ong Tiauw dan Ma Han,

„Tian taydjin dan Tjhio taydjin,” kata itoe doewa orang, „Siangya soeroe menanjaken apa itoe adat-istiadat boewat mengadep pada baginda keizer soeda diadjarken dan dipahamken sampe mateng?”

„Soeda,” djawab Tjhio Peng sembari manggoetken kapala.

Dari dalem ada dibawa kabar, bahoewa baginda keizer soeda menoedjoe ka Liong-tou-kok, diprentahken semoewa orang boleh masoek. Begitoelah Tian Tjiauw dan Tjhio Peng kapalaken itoe semoewa orang masoek ka dalem Hou-tiat-boen, meliwati Tjiauw-tek-boen, Kim-so-boen dan Giok-sek-boen, teroes menoedjoe ka pintoe taman-boenganja keizer. Di sini laen-laennja tida bisa masoek teroes, katjowali Lamhiap dan Hwan-kang-tji. Sebab ia berdoewa ada memangkoe djabatan Gie-tjian Sam-pin Hok-wie. Tapi Tian Tjiauw sendiri sadja jang menoenggoe prentah di sabelah bawahnja itoe paseban Liong-tou-kok, sebab Tjhio Peng moesti mengoeroes dan pimpin pada itoe orang-orang.

Pauw Kong lebih siang soeda masoek ka dalem itoe taman boengah dan itoe waktoe djoestroe lagi berdiri di bawah tangga batoenja itoe paseban boewat menoenggoe pada baginda keizer. Tida antara lama kamoedian ada bebrapa banjak orang kebiri jang berdjalan kaloewar dari sabelah dalem sembari moeloetnja berseroeh : „Baginda keizer dateng!” Blakangan ada berdjalan kaloewar dari satoe rombongan dan seperti djoega jang doeloean berseroeh sabagimana tadi. Dan koetika rombongan orang kebiri jang katiga berdjalan kaloewar, iaorang tida brani berseroeh lagi seperti jang doeloean, sebab marika terpisa terlaloe deket pada baginda keizer. Tida antara lama satoe djoli terboeka jang didoedoekin oleh keizer Song Djin Tjong digotong kaloewar. Pauw Kong lantas berloetoet dan mendjoera di pinggiran djalan itoe taman.

„Hamba, Pauw Tjin, mengadep pada djoengdjoengan, harep sadja toewan'koe Ban-swee, ban-ban-swee.”

Baginda keizer Song Djin Tjong dalem iapoenja djoli berkata : „Kheng, boleh bangoen berdiri.”

Itoe djoli karadjahan digotong teroes sampe di bawahnja

itoe paseban Liong-tou-kok, kamoedian keizer Song Djin Tjong lantas toeroen dari djoelinja dan berdoedoek di hadapan soeatoe medja. Pauw Kong kombali membri hormat. Tan Lim Tjong-kwan madjoe menghatoerken itoe daftar nama-nama jang lantas dipreksa oleh baginda keizer, di mana ada ditoelis dengan terang orang banjak poenja djasa, asal-oesoel dan gelaran, sedeng marika jang tida maoe mendjabat pakerdjahan negri djoega, ada ditoelis dengan terang di sitoe.

Keizer Song Djin Tjong satelah preksa itoe daftar nama dengan terang : pertama Tie Hoa, jang dengan melanggar bahaja pergi mengambil itoe soerat-perdjandjionnja Siang-yang-Ong dan kontjo-kontjonja, doeloean ia soeda poera-poera bertaloeck ka Koensan boeat menoeoengin Tian Hok-wie, maka ia poenja djasa boleh dibilang paling besar, tapi ini orang tida maoe mendjabat pakerdjahan negri, malah orangnja poen soeda menjjingirken diri. Hal mana membikin keizer Song Djin Tjong djadi mengelah napas.

Sateroesnja baginda liat ada tertoeelis namanja Pak-hiap, Aug-yang Tjhoen, ini orang djoega tida maoe mendjabat pakerdjahan negri, sabalijnja ia hendak masoek mendjadi hweeshio. Kamoedian In-tiong-ho, Goei Tjin, ada satoe saykong ; Song-hiap, Teng Tiauw Lan dan Teng Tiauw Hoei, doewa-doewa tida maoe mendjabat pakerdjahan negri ; See Liong, Beng Khay, Tjiauw Tjia, Pek-bian-poan-koan—Lioe Tjeng. Siauw-Tjoe-kat—Sim Tjong Goan. Itoe semoewa diprentahkan boewat lantas mengadep. Orang-orang kebiri jang berdeketan di sitoe lantas sampeken itoe prentah. Di sabelah bawah, Tian Him Hoei bersama satoe taykam pergi ka pin-toenja itoe taman-boengah boewat adjak itoe bebrapa orang jang dipanggil mengadep. Koetika marika itoe sampe di atas tangga batoe, Tan Lim lantas tarik badjoenja Auw-yang Tjhoen disoeroe berloetoet, Itoe semoewa orang dengan berdjedjer lantas pada berloetoet, mendjalanken adat-istiadat sabagimana moestinja.

Keizer Song Djin Tjong lantas kasi prentah soepaja marika itoe mengangkat badan dan memandang ka atas. Itoe se-

moewa orang lantas mengangkat badan, tapi tida brani memandang pada keizer dan iaorang poenja mata pada meliatin marika poenja hidoeng sendiri sembari menahan napas. Keizer lantas memandang pada iaorang, itoe waktoe Tan Lim lantas menghamperi boewat menjeboetken iaorang poenja nama satoe per satoe. Sebab lebih doeloe ini kapala orang kabiri soeda tanjaken dengan terang sasoeatoe orang poenja nama.

Keizer Song Djin Tjong moelai liat Pak-hiap jang memake pakean dari soetra oengoe, matanja berwarna blao dan moekanja jang merah memake brewok dan tjambang, hingga iapoenja roman ada banjak mirip sama Tjiong Lie Koan, salah-satoe dewa di antara Patsian. Kamoedian baginda mengawasi pada Goci Tjin, jang memake pakean pertapahan berwarna aboe-aboe, begitoe poen warnanja iapoenja boengkoesan kapala. Koelit moekanja poetih seperti batoe giok, halisnja lemas dan matanja pandjang, di antara bibirnja ada toemboe tiga baris koemis dan djenggot pendek. Sedeng itoe doewa soedara Teng, semoewanja memake pakean jang serba idjo dan memake boengkoesan kapala Boeseng. Iaorang poenja roman poen tjakep dan toeboenja ada bersamahan satoe dengan laen, malah roepanja djoega ada begitoe mirip.

Kamoedian baginda memandang pada See Liang, jang memake pakean soetra berwarna tanah dan boengkoesan kapala jang meroepaken boentoet bebek. Iapoenja moeka sabagi warnanja batoe giok oengoe, sedeng moekanja ada memake koemis dan brewok jang soeda berwarna poetih. Beng Khay memake pakean warna merah dan Tjiauw Tjia hitam, sedeng Sim Tiong Goan dan Lioe Tjeng doewa-doewanja memake pakean warna biroe, tjoema jang satoe toeboenja koeroes dan jang laen gemoek.

Pada sasoeda baginda keizer meliat marika itoe semoewa dengan terang, kerna taoe iaorang tida maoe mendjabat pakerdjahan negri, maka ia poen tida maoe memaksa. Dikasi prentah pada Pak-hiap, Auw-yang Tjhoen, boewat masoek djadi hweeshio di Tay Siang Kok Sie dan mengangkat goeroe pada Liauw Djian Hweeshio, serta dikasi

satoe gelaran Poo Siong Hweeshio. Sebab menoeroet pikiranja baginda keizer, biar poen Pak-hiap soeda masoek mendjadi orang pertapahan, tetap ingin ia membantoe melindoenjin karadjahan Song. Diprentahkan djoega kamoedian aken didirikan satoe gredja di district Siang-soei, jang aken dinamaken Sam Kauw Sie, bila kamoedian soeda menerima pengadjaran soetji, ia moesti mengepalai itoe gredja Sam-Kauw.

Goei Tjin dipersen pakean pertapahan jang tersaloet aermas jang lengkap sama kaos dan sepatoenja. Bagi iapoenja gredja ada dikasi present beras dan kajoe bakar, tapi tida dipresent soetra atawa emas perak, kerna orang pertapahan tida perloe sama barang-barang jang saroepa itoe.

Song-hiap, Teng Tiauw Lan dan Teng Tiauw Hoei, di-koerniaken doewa bintang perak jang dioekir doewa hoeroef „Hiap-gie”, jang dalem itoe waktoe djoega diprentah pada Tan Lim boewat tjantoeemken di dadanja itoe doewa orang. Laen dari itoe ada dikasi present lagi emas, perak dan soetra-soetra. Sim Tjong Goan, Lioe Tjeng, See Liong, Beng Khay dan Tjiauw Tjia, semoewanja dikasi present emas, Lioe Tjeng, See Liong, Beng Khay dan Tjiauw Tjia, semoewanja dikasi present emas perak dan soetra-soetra.

Itoe semoewa orang lantaspada mendjoera sembari hatoerken trima kasi dan teroes pada moendoer.

Baginda Song Djin Tjong kasi prentah lagi pada Liong Tho, Yauw Beng, Soe In, Liok Pin, Louw Eng, Him Wie, Han Liang, Peh Giok, Ma Liong, Thio Pa, Pang Jan, Teng Pioe, Ouw Liat, Heng Djoe Liong dan Heng Djoe Houw, semoewanja dateng mengadep ka bawah Liong-tou-kok. Koe-tika itoe semoewa orang soeda mengadep dengan berloetoet berdjedjer hatinja baginda keizer merasa sanget girang, meliat itoe sakawanan orang jang begitoe gagah dan garang, sekalipoen romannja ada jang tjakep ada djoega jang djelek. Marika semoewanja dikasi pangkat Liok-pin Hauw-wie. Pada sasoedanja marika hatoerken trima kasi laloe pada moendoer.

Baginda keizer kombali kasi prentah Pek In Seng dan ampat soedara angkatnja dateng mengadep. Tida antara lama

kamoedian itoe lima orang soeda dibawa dateng mengadep. Tan Lim kasi tanda soepaja Pek In Seng berloetoet dan djalanken peradatan sabagimana moestinja. Tapi ini lima orang boekannya berloetoet dengan berdjedjer seperti jang doeloean, hanja satoe per satoe berentet satoe dengan dari depan te-roes lempeng ka blakang.

Itoe semoewa ada atas maoenja Tjhio Peng. la sengadja taro orang jang romannya djelek di sabelah blakang. Baginda keizer lantas kasi prentah soepaja Pek In Seng mengangkat badannya. Itoe anak moeda lantas menoeroet dengan mata meliat ka bawah.

Keizer Song Djin Tjong satelah meliat pada In Seng, lantas djadi terkenal pada kaādahan doeloe hari. la djadi dapet inget pada Pek Giok Tong jang dateng menoelis sairan di Liong-tou-kok. Sebab itoe anak moeda poenja roman sedikit banjak ada mirip sama iapoenja paman. Dengan tida merasa lagi baginda keizer mendjadi sedih dan ampir sadja ia menoempahkan aer mata. Koetika baginda keizer membatja itoe daftar nama, ia liat gelarannya Pek In Seng ada Giok-bian-siauw-Tjoan-tjoe (Tjoan Tjoe ada namanja saorang gaga di djeman Tjiangkok jang berbakti pada orang toewannya). Lantas baginda ksizer taoe bahoewa In Seng ada satoe anak jang berbakti pada iboenja, hal mana soeda membikin baginda keizer mendjadi senang dan soeka. Sebab pribahasa ada bilang : mantri jang setia moesti kaloewar dari koelawarga jang berbakti. Dalem itoe daftar ada diseboetken ia pande menggoenaken golok. Itoe waktoe baginda keizer lantas kasi prentah Pek In Seng tjoba pertoendjoekin iapoenja ilmoe golok.

Tan Lim lantas menghamperi pada itoe anak moeda dan berkata : „Baginda keizer kasi prentah soepaja kaeo pertoendjoekin kaeo poenja ilmoe silat golok.”

Pek In Seng lantas memandang pada Tan Tjongkwan dan berkata : „Ini waktoe akoe tida membawa sendjata.”

„Kaeo poenja sendjata ada di mana ?” menanja Tan Lim.
„Ada di sabelah loewar pintoenja ini taman.”

Tan Lim lantas soeroe salah-satoe orang kebiri pergi ambil itoe golok. Tida antara lama itoe taykam soeda balik kombali dengen membawa itoe sedjata, jang lantas dipasrahken pada Tan Tjongkwan, orang siapa lantas samboeti dan berloetoet di soeatoe tempat jang sedikit djaoeh dari medjanja keizer, kamoedian ia angkat itoe golok ka atas dengen kadoewa tangannja boewat dtpreksa. Sasoedanja itoe, Tan Lim lantas trimaken itoe golok pada Pek In Seng.

„Akoer terpaksa moesti berlakoe koerang hormat di hade-pannja baginda keizer,” kata ia pada itoe kapala orang kebiri.

„Berlakoe koerang hormat bagimana?” menegesken itoe kapala taykam.

„Akoer moesti goeloengken akoe poenja tangan badjoe dan selitken ka atas akoe poenja badjoe. baroelah akoe bisa bersilat dengen laloewasa.”

„Itoelah tida ada halangannja, sebab kaloe boekannja begitoe kaer poen tida bisa pertoendjoeken kaer poenja ilmoe kapandean. Sekarang kaer boléh lantas moelai.”

Pek In Seng lantas goeloeng kadoewa tangan badjoenja dan selitken badjoenja ka iapoenja tali pinggang. Itoe golok ia soeroeng ka blakang dan lantas mendjoera, berbareng dengen itoe, kadoewa tangannja ditaro ka blakangnja, jang kiri mamegang saroengnja itoe sendjata, sedeng jang kanan mamegang gagangnja itoe golok, kamoedian ia goenaken satoe tipoe jang dinamaken „Yauw-tjoe-hwan-sin,” meniroe perboeatannja satoe alap-alap balikin badannja naek terbang ka atas. Baginda keizer tjoema meliat sadja itoe anak moeda berloetoet di sitoe, koenjoeng-koenjoeng ia berlompat ka atas dan dalem tangannja soeda mamegang satoe golok jang terhoenoes, tapi tida kataoean tjara bagimana menjaboet golok itoe kaloewar dari saroengnja.

Pek In Seng lantas moelai bersilat sama iapoenja golok dengen soenggoe-soenggoe. Ternjata iapoenja ilmoe silat golok ada sanget bagoes. Itoe sendjata sabentar ka depan sabentar ka blakang, kiri, kanan, atas dan bawah, dengen bergantian

dibatjokin, ditoesoekin, diserampangin dan disabetken. Dari sebab di latarannja itoe Liong-tou-kok ada digelari permandani, pada waktoe itoe anak moeda berlompat pergi-dateng, kakinja sama-sekali tida bersoewara koetika mengindjak boemi. Pada sasoedanja ia bersilat sampe di achirnja, iapoenja napas tida memboeroe dan iapoenja moeka tida djadi berobah, kamoedian dengan sabar ia lantas berloetoet lagi di tempat tadi.

„Sasoenggoenja djoega tida katjiwa sebagai toeroenannja satoe panglima perang,” kata keizer Song Djin Tjong.

Kamoedjan ia liat namanja Louw Tien jang terseboet bisa bersilat sama sendjata pedang. Itoe anak moeda poen disoeroe lempangkan toeboenja, ternjata ia ada satoe pamoeda tjakep dalem pakean jang berwarna kembang trate, biarpoen langsing tapi ada sampe pasek dan gagah. Baginda keizer poen lantas kasi prentah soepaja itoe anak moeda mempertoendjoekin iapoenja ilmoe kapandean.

„Baginda keizer prentah kaeo pertoendjoekin kaeo poenja ilmoe silat pedang,” kata Tan Lim jang menghampiri pada Louw Tien.

Itoe anak moeda kasi taoe bahoewa iapoenja pedang ada di loewar taman, jang lantas disoeroe pergi ambil. Pada sasoedanja dikasi toendjoek doeloe pada baginda keizer sabagimana doeloean, baroelah ditrimaken pada itoe anak moeda.

FATSAL XVI.

Baginda Song Djin Tjong kasi prentah bahoewa Louw Tien boleh lantas moelai bersilat. Itoe anak moeda poen menoe-roet toeladannja iapoenja twako, menjaboet pedangnja dari sabelah blakang. Louw Tien poenja ilmoe silat pedang ia dapet perladjarken dari Teng Tiauwoe Hoi. Dasaran iapoenja otak sanget tadjem, dengan sasoenggoenja djoega ia soeda bisa dapet peladjarken ilmoe kapandeannja iapoenja goeroe, jang sekarang ia boleh pertoendjoekin dengan bangga di hadepannja baginda keizer. Bermoeala iapoenja pedang di-maenken sadjoeroes, tapi blakangan samingkin lama djadi samingkin tjepat, hingga kaliatannja sabagi djoega soeatoe toempoekan pedang, sabagi satoe rante besi jang mengiterin sakoedjoer badannja itoe orang jang bersilat.

Baginda keizer bersama semoewa orang jang tida menjaksiken tida ada satoe jang tida memoedji. Pada sasoedanja Louw Tien bersilat sampe di achirnja, ia poen berloetoet kombali di tempatnja tadi. Moekanja poen tida berobah dan napasnja tida memboeroe.

Kamoedian baginda keizer prentahken Ngai Houw pertoendjoekin iapoenja ilmoe kapandean silat tangan kosong. Itoe waktoe ia ada memake pakean serba idjo gelap, toeboenja biar poen tida tinggi, tapi potongannja sanget keren dan garang. Halisnja gomplok, idoeng mantjoeng, moeloet lebar dan toeboenja tegap dan pasek.

Baginda keizer sasoedanja meliat ia itoe poenja roman lantas kasi prentah boewat moelai. Kombali Tan Lim jang kasi taoe pada itoe anak moeda.

Lantaran ia tida perloe memake sendjata apa-apa, dalem saät itoe djoega ia moelai goeloeng tangan badjoenja dan selitken badjoenja pada iapoenja tali pinggang. Dengan sakoenoeng-koenoeng ia berlompat sampe sapeloeh kaki tingginja, kamoedian ia berdiri dengan tegar, tida berbeda sabagi sikep soeatoe koetjing, sedikit poen tida kadengeran soewara kakinja. Pada sasoedanja ia bersilat, ia poen ber-

loetoet kombali sabagimana kawan-kawannja jang laen. Baginda keizer tida brentinja memoedji kamoedian dikasi prentah soepaja Tji Liang lempengken toeboenja. Sabagitoe lekas fa meliat romannja San-see-gan, baginda keizer merasa heran.

Itoe waktoe ia memake pakean jang berwarna itam, tapi dandanannja ada seperti biasanja saorang gagah, moekanja itam ditimpalin sama sapasang halis poetih jang toeroen ka bawah, dengan begitoe iapoenja roman ampir tida berbeda sama setan jang gantoeng diri. Dalem daftar ada terseboet ia itoe ada anaknja Tji Kheng dan iapoenja gelaran diseboet Too-pek-him, djoega tergelar San-see-gan. Lantaran meliat romannja jang begitoe djelek, hatinja baginda keizer ada sedikit koerang senang. Dalem itoe daftar ada diseboet djoega bahoewa ia ada mempoenjai kapandean, satoe tangan bisa malepasken tiga matjem sendjata resia.

Baginda Song Djin Tjong pikir, tjara bagimana satoe tangan bisa malepasken tiga matjem sendjata resia, boewat mendapat kanjataan, laloe diprentahken soepaja Tji Liang mempertoendjoekin iapoenja ilmoe kapandean. Koetika Tan Lim dateng kasi taoe pada itoe anak moeda, ia itoe lantas berkata :

„Tjongkwan, tjara bagimana akoe moesti pertoendjoekin akoe poenja kapandean?“

„Hei, itoelah akoe tida taoe,“ djawab Tan Lim, „tjara bagimana akoe berbalik menanjaken hal itoe padakoe?“

„Djika akoe malepasken akoe poenja tiga sendjata resia dengan berbareng,“ kata San-see-gan, „di sabelah depan moesti ada barang jang menghalangin, sebab kaloe boekannja begitoe, djadi tida bisa diliat kadjitoeannja. Di sini apa ada boelan-boelan jang biasa digoenaken boewat orang memanah?“

„Ada,“ kata Tan Lim.

„Akoe harep kae soeka soeroe ambil satoe dan di blakangnja ditoelak sama sapotong papan soepaja bisa berdiri dengan tetap. Itoe waktoe akoe nanti pertoendjoekin akoe poenja ilmoe kapandean.“

Tan Lim lantas soeroean orang pergi ambil itoe barang jang perloe. Tida antara lama kamoedian itoe boelan-boelan soeda dibawa dateng. Tji Liang liat, tingginja ada toedjoe kaki dan lebarnja satoe kaki, sedeng di pinggirnja memake lijt dari kajoe dan di tengah-tengahnja ada satoe papan lebar, jang ditemelin sama satoe lapis kaen poetih; tapi lantaran masi dianggep koerang poeti, kembali diatasnja dikapoerin sama aer kapoer. Itoe boelan-boelan soeda ditoelak berdiri oleh salembar papan dari blakangnja, kamoedian Tan Lim lantas dateng menghamperi pada Tjie Liang.

„Akoë soeda soeroe atoe sabagimana kaoë poenja kahendakan,” kata ia. „Sekarang tjoba kaoë liat dengen betoel, apa kaoë bisa tembak kena itoe papan atawa tida? Djika kaoë rasa tida bisa kena, akoë maoë soeroe orang pergi ambil lagi jang besaran.”

„Apabila akoë tida bisa tembak kena itoe papan boelan-boelan, akoë tida bisa diseboet lagi Too-pek-him, hanja moesti diseboet sadja Kaaw-him alias biroewang-andjing. Akoë harep kaoë soeka hatoerken pada baginda keizer soepaja soeka bikin tiga tanda merah, jang berentet dengen lempang dari atas ka bawah. Akoë poenja tiga sendjata resia semoewanja moesti menantjep di tengah-tengahnja itoe tiga tanda merah, baroelah ternjata akoë poenja ilmoe kapandean.”

„Hei, anak, kaoë djangan maen gila,” kata Tan Lim. „Djika menoeroet akoë poenja pikiran, bila kaoë soeda bisa menembak kena pada itoe papan boelan-boelan, soeda boleh dianggep samatjem kapandean bagoes.”

„Tida, biar bagimana djoega, akoë tida maoë menembak pada itoe papan boelan-boelan sadja,” kata Tji Liang dengen membeler.

Tan Lim dengen apa boleh boewat hatoerken kainginannja Tji Liang pada baginda keizer. Keizer Song Djin Tjong hatinja merasa koerang senang. Sebab ia anggep Tji Liang poenja omongan terlaloe terkeboer. Kaloe ia lantas menoeroeti itoe kainginann bikin tiga titik merah sama pit gintjoe,

di atas itoe papan boelan-boelan, jang besarnja tida lebih dari oedjoengnja satoe djaroem, djangan kata bisa kena ditembak, biar poen diliat tida bisa kaliatan tegas. Dengan begitoe, apabila Tji Liang tida bisa kena tembak itoe titikan merah, boekan sadja ia sendiri aken mendapet maloe, malah ajahnja poenja nama jang soeda termashoer djoega aken toeroet tertjemar. Maka baginda lantas kasi prentah soepaja Tan Lim sadja jang membikin itoe tiga tanda merah di atas itoe papan boelan-boelan.

Tan Lim menerima prentah dan bawa itoe papan boelan-boelan, kamoedian ia ambil itoe pit gintjoe jang ditjelapken pada tempat gintjoenja. Ia poen berpikiran sabagimana baginda keizer. Ia anggep Tji Liang poenja omongan terlaloe terkeboer. Kaloe sadja ia bikin itoe tiga tanda terlaloe ketjil dan Tji Liang tida bisa kena tembak sama iapoenja sendjata resia, nistjaja ia aken disesalken; djika itoe tanda-tanda dibikin terlaloe besar, sebaliknya tida bisa mengoendjoek Tji Liang poenja ilmoe kapandean dan djoega ia koewatir baginda keizer koerang senang. Tapi achirnja ia ambil poetoesan boewat bikin tanda-tanda jang besar sadja. Sebab ia mengingat persobatan sama ajahnja itoe pamoeda.

Pada sasoedanja ia berpikir tetap, lantas ia moelai menotol sama oedjoeng itoe pit gintjoe ka moekanja itoe papan boelan-boelan; tapi ia gojang pergi dateng itoe pit, sabagi djoega orang jang maoe bikin itoe totolan mendjadi boender betoel. Pada itoe waktue totolan dibikin boender, besarnja soeda sama dengen bidjinja satoe boewah Thoo. Bègitoelah ia landjoetken pakerdjahannja itoe sampe tiga tanda merah djadi terloekis dengen rata dari atas moedjoer ka bawah. Baginda keizer poen mengarti maksoednja iapoenja orang kebiri jang dipertjaja dan disajang. Pada sasoedanja selesah Tan Lim taro kombali itoe pit kamoedian berpaling pada Tji Liang.

„Tjoba kaeo liat, anak moeda,” kata ia, „apa ini tiga tanda soeda tjoekoep besar?”

„Djika itoe masi dikataken terlaloe ketjil, dengen sasoeng-

goenja akoe ini ada Kauw-him," kata San-see-gan.

Tan Lim lantas soeroe orang pasang itoe papan boelan-boelan di sabelah Selatan. Tji Liang liat di tengah-tengahnja itoe papan boelan-boelan ada terloekis dengan njata itoe tiga tanda merah, di laen fihak ia bikin persediaan iapoenja sendjata-sendjata resia jang moesti dilepasken. Orang tentoe ingin mendapet taoe apa jang dimaksoedken sama itoe perkatahan tiga matjem sendjata resia. Ternjata itoe dimaksoedken doewa sioetjhi dan satoe notjhi. Maka itoe waktoe ia sediaken doewa batang sioetjhi dan satoe batang „Kin-pwee-tee-thauw-hwa-tjhung-no-tjhi. Tatkala Tan Lim dateng mengasi taoe bahoewa, baginda keizer mengasi prentah soepaja ia moelai oendjoek ilmoe kapandeanja, ia tjoema brani manggoetken sedikit kapala tapi tida brani berloetoet dan mendjoera, sebab djika ia berboewat begitoe, itoe notjhi lantas sadja menembak kaloewar. Inilah djoega sebabnja dinamaken Kin-pwee-tee-thauw, sebab djika badan dibongkokin dan kapala mendjoera ka depan, itoe anak panah lantas menembak kaloewar dari pekakasnja jang tersimpem dalem badan.

Sabagitoe lekas Tan Lim habis bitjara, Tji Liang lantas bongkokin badannja ka djoeroesan Selatan berbareng dengan itoe kadoewa tangannja digerakin sedikit, tjoema kadengeran sadja sedikit soewara tengtengan tiga kali. Tapi tida ada barang saorang jang meliat ka djoeroesannja itoe papan boelan-boelan, hanja semoewa pada mengawasi sadja pada Tji Liang, jang itoe waktoe lantas pergi berloetoet kombali di tempat tadi dengan tida bergerak.

Baginda keizer kasi prentah lagi soepaja Tji Liang mempertoendjoekin iapoenja ilmoe kapandean, prentah mana disampeken kombali oleh Tan Lim jang dateng menghamperi. Tapi Tji Liang tinggal diam dengan tida bersoewara. Itoe kapala orang kebiri kombali oelangken itoe prentah.

„Hei, anak moeda, baginda keizer prentah kaeo mempertoendjoekin kaeo poenja ilmoe kapandean," kata ia, „mengapa kaeo tinggal diam di sini?"

Tji Liang lantas mendjoera pada itoe kapala orang kebiri.

„Akoe poenja tiga sendjata resia soeda menantjap di atas itoe papan boelan-boelan,“ kata ia. „Harep sadja Tjongkwan soeka pergi njataken sendiri.“

Itoe kapala orang kebiri lantas pergi menghamperi dan tengok itoe papan boelan-boelan, betoel sadja itoe doewa sioetjhie dan satoe notjhie manantjep di tengah-tengah itoe tiga tanda merah. Hal mana soeda membikin Tan Lim djadi sanget heran, sebab menoeroet iapoenja penglihatan, Tji Liang sama-sekali tida menembak ka djoeroesan itoe papan boelan-boelan. Maka itoe waktoe ia lantas hatoerken pada baginda keizer atas apa jang soeda terdjadi. Tatkala baginda keizer njataken sendiri betoel sadja keliatan ada doewa barang pandjang dan satoe pendek, jang menantjap di tengah-tengahnja itoe tiga tanda merah. Soeda tentoe sadja baginda keizer mendjadi sanget girang dan tida abisnja memoedji.

„Itoelah ada sendjata-sendjata resia jang bagoes dan aneh,“ kata Song Djin Tjong. „Sendjata resia jang samatjem itoe, boleh dibilang dari doeloe hingga sekarang djarang ada terdapat.“

Sahabisnja berkata kombali baginda kaizer meliat itoe daftar nama. Koetika ia meliat namanja Han Thian Kim jang memake nama gelaran Pek-lek-koei (jang berarti setan gledek), lantas memandang ka djoeroesannja itoe orang. Si goblok tida menoenggoe lagi prentah, lantas sadja berbangkit mengoesoet-ngoesoet peroet dan dada, sedeng iapoenja kadoewa mata di'intjarken pada baginda keizer. Hal mana soeda membikin Tan Lim djadi sanget terkedjoet dan toeboenja djadi bergoemeteran. Dengan tjepet ia menghamperi dan pegang badannja Han Thian Kim serta soeroe ia mendjoera lagi sabagimana tadi.

„Akoe merasa pegel moesti mendjoera teroes-meneroes bagitoe roepa,“ kata Han Thian Kim.

„Tida perdoeli, kae moesti mendjoera teroes,“ menjentak itoe kapaln orang kebiri.

Terpaksa Han Thian Kim moesti mendekam lagi sabagimana doeloeran; tapi sabagitoe lekas Tan Lim berlaloe, kembali ia mengangkat badan sembari mengoesoet-ngoesoet peroet dan memandang pada baginda keizer. Tapi sabaliknja keizer Song Djin Tjong tida djadi goesar, sebab mengetahoei bahoewa ia itoe ada saorang kasar dan goblok. Dari sebab dalem daftar tida ada diseboet ia mempoenjai ilmoe kapandean apa-apa, salaennja diseboet bertenaga besar, djadi tida taoe moesti menjoeroe ia pertoendjoekin kapandean bagimana. Maka lantaskasi prentah Han Thian Kim boleh mempertoendjoekin iapoenja kapandean dengan merdika, ja itoe meneroet apa jang ia rasa baik. Tan Lim lantasmenghamperi pada Han Thian Kim dan berkata: „Baginda keizer soeroe kaeo pertoendjoekin ilmoe kapandean.“

„Pertoendjoekin ilmoe kapandean apa?“ balik menanja si Goblok.

„Akoemanataoe kaeo adamempoenjai ilmoe kapandean apa,“ kata Tan Lim. „Tapi sabetoelnja kaeo adamempoenjai ilmoe kapandean apa?“

„Akoebisamakan nasi,“ kata si Goblok.

„Djangan omong sembarangan,“ menjentak itoe kapala orang kebiri. „Akoetanja kaeo adamempoenjai ilmoe kapandean apa?“

„Akoebisamembegal orang ditengah djalanan,“ kata Han Thian Kim.

„Ach, apa kaeo bilang? Beroentoeng terpisa sama baginda keizer djaoe djoega, kaloesampe kadengeran apajang kaeo kataken, nistjaja kaeo bakal mendapat marah besar dari baginda keizer.“ Pada sasoedanja merandek sabantaran kembali ia menambahkan: „Tida perdoeli kaeo adamempoenjai kapandean apa djoega, kaeo boleh tjoba kasi oendjoe, soepaja kaeo poen bisa mendapat pangkat; kaloe tida, laenlaen orang mendapat pangkat, tentoe tjoema kaeo sendiri jang tida,“

Han Thian Kim satelah mendenger itoe omongan, hatinja merasa sanget iboek. Itoe waktoe kadengeran soewara jang

berkerekakan dan Tan Lim toendoekin kapalanja meliat, ka bawah, ternjata itoe permadani jang digelar di atas djoebin, telah berlobang di sapoeloh tempat. Lantaran apa ia djadi taoe bahoewa ini orang poenja tenaga sasoenggoenja tida ketjil,

„Hei, masatah kae sama-sekali tida mempoenjai kapandean satoe apa?“ mendesak lagi Tan Lim.

„Ah, ah, siapa bilang akoe sama-sekali tida mempoenjai ilmoe kapandean satoe apa,“ kata Han Thian Kim dengan djengkel. „Na, na, tjoba kae liat marika itoe boekannja ada mempoenjai ilmoe kapandean? Tapi akoe bisa tjekel iaorang satoe per satoe dan teroes dilemparken ka atas genteng roemah.“

„Ach, mana boleh oendjoek kapandean dengan tjara begitoe!“ menjentak itoe kapala orang kebiri dengan pengra-sahan djengkel.

„Habis bagaimana baeknja?“ kata Han Thian Kim dengan bingoeng. „Iaorang semoewa aken mendapet pangkat, tjoe ma akoe sadja jang tida kabagian.“

Bitjara sampe di sini ia liat itoe lankan jang terbikin dari batoe poetih dan menambahkan lagi: „Ako bisa bikin antjoer itoe lankan batoe.“

„Ai, itoelah tida boleh, anak gelo,“ kata Tan Lim. „Meroesakin barang dalem tempat terlarang, apa kae taoe bakal mendapet hoekoeman apa?“

Djoestroe pada waktoe iaorang bitjara dengan belon mendapet kaberesan, sabalijnja baginda keizer jang telah dapet-ken satoe pikiran. Baginda poen merasa sanget soesa sama oeroesannja Han Thian Kim, dengan tida sengadja baginda tjendorongken toeboenja meliat ka sebelah kiri dan kanannja itoe paseban. Ini Liong-tou-kok terletak di sebelah Barat dan menghadep ka Timoer, sedeng itoe roewangan jang didiamin oleh baginda keizer di itoe waktoe lebarnja ada lima petakan dan pandjangnja limabelas petakan. Di sebelah Selatan Oetaranja itoe paseban ada doewa bangkoe batoe, di atas mana ada ditaro doewa „Teng“ (samatjem koewali jang me-make tiga kaki) besi.

„Han Thian Kim lantaran ada mempoenjai tenaga besar,“ kata keizer Song Djin Tjong, „di sini ada doewa Teng besi, belon taoe apa ia koewat angkat atawa tida. Di djeman doe-loekala karadjahan Tjin ada saorang gagah jang bernama Beng Poen, telah berlomba mengangkat Teng sama Tjin Boe Ong, tapi jang terseboet blakangan lantaran kahabisan tenaga djadi binasa. Pauw-kheng, apa inget ini hikajat?“

„Hamba inget betoel hikajat itoe, djoengdjoengan jang maha moelia,“ djawab itoe ambienaar jang ditanja.

Tan Lim lantas mengamperi lagi pada Han Thian Kim dan berkata: „Baginda keizer soeroe kaeo mengangkat itoe kwali-besi, apa kaeo bisa?“

„Apa jang dikataken mengangkat koewali-besi?“ balik menanja si Goblok.

„Tidalah heran djika ia bilang jang ia tjoema bisa makan nasi,“ berkata Tan Lim dalem hati, „sebab sekarang ternjata iapoenja otak begitoe poenja poentoe.“ Kamoedian ia menoendjoek pada itoe „Teng“ dan berkata dengan soewara terang: „Itoelah jang dinamaken Teng!“

„Och, kiranja itoe barang permaenan ketjil,“ kata Han Thian Kim. „Apa diangkat sama sabelah tangan atawa doewa tangan?“

„Sama doewa tangan akoe rasa belon tentoe kaeo koewat angkat kata Tan Lim. „Tjoba kaeo pergi doeloe ka sana boewat tjoba-tjoba.“

Orang tentoe merasa heran bagaimana di hadepannya baginda keizer, itoe kapala orang kebiri brani berboewat menoeroet sabagimana ia sendiri poenja mae. Sebab pada djeman pamerentahan sawenang-wenang, keizer itoe tida berbeda sabagi Allah, jang orang moesti takoetin dan hormatken. Tapi pertama lantaran Tan Lim ada satoe orang jang berdjasa besar dalem hal menoeloengin baginda keizer koetika masi mendjadi satoe baji, lagian memangnja keizer Song Djin Tjeng ada satoe keizer jang bersifat adil dan moerah.

Itoe waktoe Tan Lim lantas adjak Han Tjian Kim menoekjoe ka sabelah Oetara, tatkala ia terbangkit berdiri, saming-

kin' ternjata iapoenja toeboe jang tinggi dan besar. Hal mana membikin baginda keizer merasa sanget girang. Dalem saät itoe djoega baginda keizer mendapat pikiran boewat mengangkat Han Thian Kim mendjadi Tjam-tian Tjiang-koen. Kamoedian apabila ada oetoesan dari loewar negri jang datang mengadep atawa koetika dibikin pesta di kraton bagi kahormatannja oetoesan negri-negri asing, boleh sekali goenaken Han Thian Kim boewat oendjoek kakerenan pada orang-orang asing, biar iaorang liat bagaimana keren dan rangnja itoe orang dari Negri Allah (Tiongkok). Sajang sekali tjoema ada satoe, kaloe ada lagi satoe djadi sapaasang, tentoe aken mendjadi terlebih baek lagi.

Sapandjang keizer Song Djin Tjong lagi berpikir, Han Thian Kim soeda pondong itoe Teng mendatengin ka depan Liang-tou-w-kok. Menoeroet adjarannja Tan Lim, di kadoewa koepingnja itoe kwali-besi di'iketin tambang jang koewat, kamoedian Han Thian Kim masoekin sabelah lengannja pada itoe tambang dan dengen kadoewa tangan ia pondong itoe Teng dengen mamegang pada kadoewa koepingnja itoe Teng. Sasampenja di depan itoe paseban, dengen memandang pada baginda keizer ia memoeter tiga kali, kamoedian baroe ia taro itoe Teng besi di atas lataran.

Baginda keizer djadi tertawa dan berkata: „Han Thian Kim bisa dibandingken sama Beng Poen di djeman doeloekala.”

Tida lama kamoedian kadengeran satoe soewara keras berkata: „Dihatoerken trima kasi pada baginda keizer poenja koernia.”

Baginda keizer lantas membri pangkat pada itoe lima orang, Pek In Seng djadi Soe-pin Tjo-hok-wie, Tji Liang Soe-pin Yoe-hok-wie, Louw Tien dan Ngai Houw mendjadi Gie-tjian Soe-pin-hok-wie, sedeng Han Thian Kim mendjadi Tjam-tian Tjiangkoen. Lantaran mengetahoei bahoewa iaorang ada bersoedarahan kiatpay dan djoega ada anak-anaknja ponggawa perang, baginda keizer lantas kasiken iaorang gelaran Siauw Ngo Gie.

Pauw Kong bersama laen-laennja semoewa hatoerken trima kasi atas baginda keizer poenja koernia itoe. Tan Lim lantas soeroe orang pergi bawa itoe sendjata golok, pedang dan sioetjhie berikoet notjhie, kamoedian soeroe Han Thian Kim bawa kombali itoe Teng besi di tempatnja. Tapi sekarang si Goblok lantas golengken kapala dan menjataken tida maeo ambil taoe lagi itoe oeroesan.

„Hei, kaloe boekannja kaeo jang bawah balik lagi ini Teng besi,” kata Tan Lim dengen iboek, „abis siapa jang koewat angkat ini barang berat?”

FATSAL XVII.

Djoestroe pada waktoe orang lagi bitjara begitoe, koe-njoeng-koenjoeng di deket pintoe taman ada kadengeran soewara orang jang berseroeh: „Wan-ong!” Itoe soewara ada begitoe keras laksana goentoer, maka dengan njata bisa kadengeran oleh baginda keizer, jang mendjadi sanget goe-sar dan kasi prentah boewat tangkep dan ikat itoe orang jang brani bertreak Wan-ong, kamoedian dibawa ka depan Liong-touw-kok boewat dipreksa.

Tida antara lama kamoedian ampat penggawe kraton telah bawa saorang jang kaki dan tangannja teringkoes. Baginda keizer liat itoe orang toeboenja tinggi, kira lebih dari sapoeloe kaki. Moekanja seperti emas moeda, di kapalanja memake ramboet jang terkepeng, sedeng pakeannja serba idjo. Sabagitoe lekas dateng deket di depannja Liong-touw-kok, itoe orang lantas berloetoet dan mendjoera.

„Hamba ada perkara jang sanget penasaran,” kata ia.

„Ini orang siapa, soeda brani brseroeh Wan-ong di moeloet pintoe taman karadjahan?” menanja baginda Song Djin Tjong pada Pauw Kong.

„Hamba oendjoek bertaoe pada djoengdjoengan,” berkata Pauw Kong sembari berloetoet, „bahoewa ini orang ada orang sabawahannja Tjiong Hiong dari Koensan, she le bernama Sia, orang kasi ia satoe gelaran Kim-tong-boe-tek Tjiangkoen.”

Makanja le Sia berseroeh wan-ong di moeloet pintoe taman, tersebut ia bersama Tjiong Hiong dan le Gie berkoempoel di soeatoe tempat, di mana ia menjaksiken sarombongan orang pada mengadep pada baginda keizer, biar poen tida dikoerniaken djabatan negri, toch semoewanja pada mendapat persenan emas, perak dan soetra-soetra, koetika iaorang balik kaloewar, semoewa orang hatoerken slamat pada marika itoe.

Tatkala itoe lima pamoeda jang mendjadi rombongan katiga masoek ka dalem, satoe per satoe disoeroe pertoendjoekin

masing-masing poenja ilmoe kapandean, itoe semoewa dari sabelah dalem tida brentinja dikabarkan ka loewar, malah pada sasoedanja mempertoendjoekin ilmoe kapandean dan dikoerniaken pangkat, dengan lekas orang di sabelah loewar mendapet taoe hal itoe. Biar poen Han Tjiang jang tadinja begitoe berkoewatir atas dirinja iapoenja anak-angkat, Han Thian Kim, satelah mendengar kabar dikoeniaken djabatan Tjan-tian Tjiangkoen, hatinja djadi merasa sanget girang dan semoewa orang pada hatoerken slamat padanja.

„Orang goblok toch ada mempoenjai redjeki njasar,” kata Tjhio Peng. „Memang djoega orang poenja redjeki soeda takdirnja Thian dan tida bisa salah lagi.”

Itoe waktoe le Sia lantas berkata pada Tjiong Hiong : „Apa kae bisa tebak apa maksoednja ini oeroesan ?”

„Maksoed oeroesan apa ?” menanja Tjiong Hiong.

„Djangan kira kae orang sekolahan dikataken perkiran loewas,” kata lagi le Sia ; „tapi akoe bisa tebak maksoednja kita poenja oeroesan.”

„Maksoed oeroesan apa sih ?” menegasken Tjiong Hiong.

„Boekantah kita orang telah ditrima menaloek ?”

„Ja, batoel begitoe.”

„Tapi menoeroet akoe poenja pengrasah itoe penerimaan menaloek boekannja dengan sasoenggoe hati, hanja ia-orang pantjing kita orang masoek ka kota radja kamoedian iaorang mae binasakan kita poenja djiwa.”

„Omong kosong !” menjentak Tjiong Hiong. „Apa kae mengarti maksoednja itoe perkatahan jang kae oetjapken ?”

„Apabila kae orang tida mae pertjaja, akoe koewatir pada waktoe kae mae menjesal soeda djadi kasep. Sebab kaloe kenar kita ditrima menaloek, mengapa kita orang tida dikasi koenia djabatan negri seperti jang laen-laenja ?”

„Nanti apabila laen-laennja soeda mendapet gilirannya, ba-roelah sampe pada kita poenja giliran.”

„Akoewakoe itoe waktoe kita orang aken mendapet giliran boewat ditabas batang leher. ltoelah sasoenggoenja boekan perkara jang enak. Melak-melak kita kena diakalin orang.

Maka apabila kita tida lebih siang bikin persediaan, sampe pada waktoenja maoe berangkat mati, baroelah kita aken mendjadi njesal."

"Ach, kaeo djangan omong segala gila-gila," menjentak Tjiong Hiong. "Djika menoeroet discipline kaeo poenja perboewatan sekarang, ada satoe kadosahan jang hendak membikin kaloet hatinja pasoeakan. Hati-hati, djangan sampe terpaksa akeo djalanken atoeran militair."

"Apabila kaeo tida maoe pertjaja akoe poenja omongan," kata lagi le Sia jang membatoe teroes, "akoe sanget koewatir biar poen bertemoes moeka pada baginda keizer djoega tida bisa. Maka menoeroet akoe poenja pikiran lebih baek kita terbitken satoe kaonaran, soepaja kita di-ikat boewat dibawa mengadep pada baginda keizer. Itoe waktos biar poen kita moesti dipanggal batang leher djoega, kita bisa berangkat mati dengan mata meram, sebab soeda mengalamken berhadep-hadepan sama baginda keizer."

"Kaloes kaeo teroesken kaeo poenja omongan gila," kata Tjiong Hiong, "sekarang djoega akoe lantasingkoes pada kaeo."

le Sia tida brani bitjara lagi; tapi dalem hatinja lebih siang ia soeda menjimpen satoes niatan. Dengan perlahan ia mendekati ka pintoenja itoes taman boengah. Sabagitoes lekas ia sampe di sitoes dengan keras ta berseroeh wan ong. le Gie djadi sanget terprandjat dan dengan tjepat memboeroe padanja. Ia tendang soedaranja sampe kadjoengkel, kamoedian ia minta tambang pada iapoenja pengikoet dan lantasingkat le Sia sabagi djoega mengikat satoes samseng. Blakangan Tjiong Hiong dan le Gie poen pasrahken diri sembari taro marika poenja kadoewa tangan di blakangnja bersedia boewat di ringkoes.

"Tjhio taydjing," kata Tjiong Hiong, "akoes harep kaeo soeka meringkoes pada kita berdoewa, kamoedian menoenggoe pretahnja baginda keizer."

"Saorang jang berboewat saorang jang moesti tanggoeng," kata Tjhio Peng, "kaoes berdoewa sama-sekali tida tersang-

koet sama ini oeroesan."

Tida antara lama prentahnja keizer soeda dateng, jang menjoeroe bawa itoe orang jang baroesan bertreak. Ie Sia lantas dibawa ka atas tangga batoenja itoe paseban, di mana ia berloetoet dan mendjoera.

Pada sasoedanja baginda Song Djin Tjong menanjaken katerangan pada Pauw Kong, lantas menanja pada Ie Sia: „Kae ada perkara penasaran apa? Sekarang kae boleh toetoerken di hadepan kami dengan teroes-terang."

„Hamba jang berdosa berdiam di Koensan," kata Ie Sia, „soeda menerima baginda keizer poenja boedi boewat menaloek dan ganti perboewatan jang tida baik. Baroesan Han Thian Kim mengangkat Teng besi telah dikoerniaken pangkat, tapi itoe orang poenja ilmoe kapandean ada sanget terpaet sama hamba poenja. Oleh kerna hamba merasa koe-watir tida bisa berdjoempa pada djoli baginda, djoengdjoe-ngankoe dan sabaliknja merasa sanget koe-watir sabentar aken dikaloewarken satoe firman, jang mamerintah memboenoeh pada hamba semoewa. itoelah sebabnja baroesan hamba soeda ambil kabranian berseroeh wan-ong. Dengan berboewat begitoe, tentoe sekali hamba aken diringkoes dan dibawa mengadep di hadepan doeli toewankoe. Djika hamba soeda bisa bertemoe sama baginda, biar moesti mati poen hamba bisa brangkat dengan kadoewa mata meram."

„Pada sasoedanja kami menerima kae orang menaloek," kata baginda keizer, „masatah kami tega memboenoeh pada kae-orang? Kami tida nanti berboewat perkara tida adil jang saroepa itoe. Baroesan kae tjela Han Thian Kim poenja kapandean. Baik, sekarang itoe Teng besi masi ada di sitoe, bila kae bisa taro kombali di tempatnja jang asal, kami maoe bebasken kae poenja saantero kadosahan."

Ia Sia lantas menjioem boemi dan berkata: „Hamba jang berdosa menerima doeli toewankoe poenja prentah."

Baginda keizer prentahken soepaja Ie Sia poenja tali ikatan dilepaskan. Itoe bebrapa soldadoe pengawal lantas malakoe-ken prentah. Ie Sia pada sasoedahnja menghatoerken trima

Kasi lantas terbangkit. Ia poen lantas sangketken itoe tang-
bang di poendaknja, kamoedian dengan kadoewa tangan ia
pegang koepingnja itoe kwali-besi dan angkat ka atas
dengan goenaken sa'antero tenaga kakoewatannja. Ternjata
iapoenja kakoewatan ada djaeoe lebih besar dari Han Thian
Kim dan djika diliat dari iapoenja sikap, ia mengangkat itoe
dengan tida terlaloe menjoesaken padanja. Pada sasoe danja
ia bertindak tiga kali ka depan dan moendoer tiga kali ka
blakang, ia lantas djalan mengiterin itoe lataran sampe doewa
poeteran, baroelah ia balik kombali ka hadepannja baginda
keizer, manggoetken kapala tiga kali.

Kamoedian dengan tindakan pesat dan tetap ia menoedjoe
ka Oetara dan dengan sabar ia taro kombali itoe Teng besi
di atas pilar batoenja. Sasoe danja beres baroe ia balik kom-
bali dan berloetoet di hadepan baginda keizer, jang meliat
itoe semoewa perboewatan mendjadi sanget girang. Baginda
pikir Han Thian Kim poenja toeboe jang tinggi besar, tadi-
nja ia merasa ingin sekali boewat dapetken lagi satoe pasa-
ngannja, tapi sekarang dengan lantas soeda didapetken. Lantas
dikaloearken satoe firman bahoewa le Sia poenja semoewa
kadosahan jang tadi dibebaskan, salaennja itoe dianoegrah-
ken djoega pangkat Tjam-tian Tjiangkoen.

Ia Sia dengan penoeh kagirangan hatoerken trima kasi.

Baginda keizer kaloewarken lagi satoe prentah boewat me-
manggil Tjong Hiong dan le Gie mengadep. Tida antara
lama kamoedian itoe doewa orang soeda dateng mengadep
dengan berloetoet dan mendjoera. Baginda keizer soeroe ia-
orang mengangkat badan dan kapala.

Baginda Song Djin Tjong liat Tjong Hiong memake kaen
boengkoesan kapala jang berwarna idjo dan di tengah-tengah-
nja ada memake perhiasan toelang poetih, sedeng iapoenja
semoewa pakean berwarna biroe terang. Paras moekanja
tjakep seperti satoe potong batoe giok, di antara bibirnja ada
memake koemis dan djenggot pendek. Tapi koetika meliat
roepanja le Gie dan iapoenja sa'antero dandanannya jang mirip
sekali sama Pek Giok Tong, kombali baginda keizer men-

djadi sedih, tapi sabrapa bisn ia singkirken kasedihannja itoe.

Tapi baginda keizer merasa sanget soesa dalem perkara mengasi djabatan pada Tjiong Hiong, jang mendjadi Tjee-tjoe dari satoe boekit seperti Koensan, jang ada delapan ratoes lie loewasnja. Djika hendak dikasi djabatan jang ketjil, tentoe sekali ia tida soeka, tapi djika maoe dikasi djabatan besar ia tida mempoenjai djasa satoe apa. Apapoela ia soeda perna mendapet gelaran Tjinsoe dalem ilmoe soerat dan perang. Tjoema sadja dasaran satoe keizer jang pinter, dalem sedikit sa'at kamoedian soeda bisa pikir satoe djalan baik. Ia anoeграhken Tjiong Hiong satoe titel Sam-pin Kekheng. Ini gelaran ada sanget tinggi, tapi tida mempoenjai kakoeasahan jang sasoenggoenja, jang sedikit banjak ada mirip dengan satoe djabatan advisieur radja. Pada semoewa radja moeda dan laen-laen orang jang bergelaran bangsawan begitoe poen pada gouverneur dan oetoesan radja, iapoenja deradjat ada sama. Laen dari itoe ia di'idzinken poelang ka Koensan boewat menoenggoe prentah, tapi tida perloe moesti dateng mengadep. Ie Gie lantaran iapoenja roman ada mirip sama Pek Giok Tong, lantas dikoerniaken pangkat Soe-pin Hok-wie.

Laen-laen Tjee-tjoe dari Koensan semoewanja dikasi titel dari djabatan Liok-pin Hauw-wie, kamoedian apabila iaorang soeda berboewat djasa apa-apa pada negri aken dikasi kannaekan lagi. Sedeng sasoeatoe liauwlow dari itoe boekit dikasi persen satoe bagian rantsuem, sabagimana djoega pasoeakan balatentara negri. Pada sasoeandja baginda keizer mengasi gandjaran dengan beres, Tjiong Hiong, Ie Sia dan Ie Gie semoewanja menghatoerken trima kasi dan toes moendoer. Sedeng itoe „Siauw Ngo Gié“ lebih siang soeda ada orang jang bawaken iaorang poenja barang-barang dan itoe waktoe djoega sama-sama berdjalan kaloewar. Semoewa orang saling menghatoerken slamat dengan riboet.

(Ada samboengannja).

